



和
1601
5



門和6
編卷
1601
5

劉子全書遺編卷之七

邑後學沈復粲編輯

文編五三墓誌銘墓表行狀錄遺傳贊祭文

江西布政使司左參議稷峰章公墓誌銘萬厯壬子閏十一月

予先外祖以經術行誼推重海內學者稱為南洲先生蚤從族兄東僊公稷峰公遊才名辟易呼章氏三傑二公先後成進士而先生卒老於行與二公為窮交自藝文外尤以道義相成始終弗替先生晚年輒呼予小子談平生縷縷足述也稷峰公病且歿囑先生曰知我者弟也異日之狀非子而誰先生許諾憶先生作狀時予以齠年受學每事筆札必命予脫稿距今二十餘年公仲子持狀來請墓中之石而先生歿且八年手澤依然能無感愴予雖非其



任猶竊以終齠年之役也按狀公系出福之浦城全城練氏之後子孫以世德顯於宋隨駕渡臨安散處三吳兩浙間其卜居會稽偃山則自添十九公始凡十二傳及公自宋歷元暨我明興二百年間科甲相望族指萬人稱東越世家公父某號東山以公貴贈某官母徐贈孺人遡而上曰某某則祖父曾高也東山四子其季爲公生而穎異十歲能屬文爲東山鍾愛十三受業於從兄孝廉東稷東稷稱賞不置曰他日當退舍避之則已嶄然露頭角矣辛卯丁東山憂甲午補郡庠生乙未同先外祖及東偁會課於柴塢山三人稱莫逆文日奇東稷諸孝廉輩果不敢以鴈行進而公尤深造自得肆筆成章出入秦漢韓蘇間爲學者斂衽無何東偁脫穎公獨與先外祖久困諸生中而視外祖尤甚自丁酉觀場後連擯有司落魄垂二十年家日貧齒日邁而自負日益奇曰世必有知予者己永遊京師假籍更名補順天生員尋爲督學趙方泉識拔聲名蔚起驚動館閣甲子遂登解額第一人成戊辰進士年已五十七矣方公舉順天北人飛章攻詭籍會華亭當國偉其文進呈請御裁肅皇帝嘉之破格完之華亭舊督浙學政進公膠庠知公曲爲公地遂荷先皇帝特簡蓋異數也釋褐授大理寺評事晉禮部歷精膳郎出爲江西參議司督儲公才識警敏遇事立辨所至輒稱其官凡十年拂衣歸里又十年以壽終於家凡人困阨不極則不奮彼蒼於豪傑大受之士所爲苦心勞形非一日而玉之成有如此者公之爲諸生也嘗客遊雲間有富家楊以馴善聞會構訪

當道屬之邑丞丞以給舍左遷於公爲梓里公偶會丞所言及之輒爲解之事竟寢公去楊知其故走金三十鎰爲謝公卻之更倍以進終不受曰辨爾誣義也終之以利初心之謂何楊感嘆而去後楊子九華貴締爲世講公初出華亭之門繼更鄭州繼又館於江陵爲諸子授經不以爲逸也華亭去鄭州代其後公見鄭州爲白華亭事侃侃不挫鄭州恚曰子獨不諱華亭耶公曰非某誰當白華亭者鄭州義之江陵秉袖方初政未底於壞公處以離合之間放意自若而論及國家事匡救居多類皆引大體持長厚切中江陵膏肓如齊魯開河之議罷犯禁連引之議寬蘇松大水之議蠲賑雖得其首肯而心實厭之卒相矛盾出之外藩假星變列左遷以去江陵敗公卒不罹清議人皆多其大節云公性孝友蚤違東山徐孺人有孟母風公體其志勉承其訓家貧受徒資館穀以養不違其懽比喪哀毀幾絕皆以不及祿養爲痛伯兄蚤世事仲兄叔兄怡怡友愛垂白無閒言嘉靖癸甲間連大祲二兄坐困公曰有弟在忍遺同氣餒耶出所餘金益以稱貸而餽粥共之姊蚤寡撫其孤恤其婚喪尤力姪婦寡而貧以姑老誓守贍之以完其節宗黨告急輒應之不責其報捐貲新宗祠助蒸嘗之禮其內行雅足法也公德度深遠脫畧苛細喜恢諧赴機如響與人油油然濶恩怨報施之情岸幘垢衣人莫測其涯涘輒呼之曰愚公乃不愚以公之才宜大有所建立顧蚤見遄歸不必盡究於用而有以自完卒享令終之福蓋有明哲保身之道焉嗚呼如公者可爲克全於其

天矣公初名紹更名禮字某稷峰其別號生於某年月日卒於某年月日享年若干娶齊氏贈孺人生庠生某娶某繼董氏封孺人生國子生英娶王氏繼董氏女許某許某某生國子生懷德娶某英生某娶陳某聘某女一許葛一許龔懷德生某聘某葬以某年月日兆以某里予生也晚不及知公姑據狀如右愧於先外祖無能為役先外祖且為予言柴塢之會齋粥畫斷不減長白卒相與有成公屢試屢北且老矣先外祖不以為病日子終必遇公之北上也先外祖實促之公猶豫先外祖謬激之口所不能決者徒以閨中繫耶丈夫之謂何遂行他日公讀書勞苦得心疾棄家走遼金華久之有甦乃返鄉人謗之坐以他故先外祖每從士大夫力洗得白公貴先外祖猶偃蹇諸生踪跡相失既罷官先外祖亦罷諸生為聚首如初先外祖每有所不可輒面折曰爾忘貧賤之日乎公改容謝曰知我之誼深矣子曰觀人於其所友君子益以是知公也銘曰

曉易其較易蒙允矣君子令德永終大智若愚至和掩恭援止而止委蛇羣公也斯舉矣羅者冥鴻千金之介不違固窮展禽曰志老氏猶龍我徵百世長者遺風

北渠章公暨配顧安人合葬墓誌銘

會稽章氏予母族也而北渠翁為先外祖族叔予太公行也憶予少孤依於身已乃析翁舍而居之奉翁父子間最久是以知翁最悉翁諱漸字某北渠其別號父某母某氏世系出全城練氏為偁山里人族最繁盛代有顯者而翁以窮約廢棄儒術翁平生質重無他腸敦尚孝義里中稱

爲長者家故貧稍稍貸貲觀貨鄧林之材走閩歛三衢間終不徒業以老然僅給饗殮而已翁雖隱商賈中未工壟斷也翁旣歿諸子或耕或仍父業漸以起家配顧安人出上虞右族與翁守寒約惟作備嘗晚而佐諸子起家後翁十年而歿先是翁得疾危甚安人露禱請以身代度不可則割股和藥而進之疾遂瘳里人頌之安人歿諸子後喪踰前喪哀毀骨立叔子天祚素食二年旣免喪思父母不置木刻二像奉於龕盟櫛起居如平生出入必告有事必卜吉而後行宗周聞而嗟異之禮失而求之野矣世傳丁蘭刻木疑不必有是事何意得之翁子哉抑亦與安人割股事後先相感者與其事近愚而其心無所爲而爲亦匹夫匹婦之至性也斯二者胥足以勸矣或曰翁教也豈其然乎宗周感其事爲翁志之墓石翁生四子長某次某次某次某翁生於某年卒於某年享年若干安人生於某年卒於某年享年若干卜兆在范橋之陽則天祚婦翁陳岐陽實有造焉其葬也以某年月日旣葬若干年而諸子始得備墓石且以其舅工部郎迴瀾先生之述來請銘於予思以不朽其親也嗚呼吾未見庶人而窆而葬其親有如此者是宜銘銘曰

范橋之陽有懸者宅望氣如虹其人孔碩玄扃千年維舊之德舊德伊何陳門奕奕旣卜旣瘞旣封且植宜爾子孫其麗不億生我者三天也罔極載鏤之金載刻之石禮失求野孝思維則

陳母劉氏姑婦同阡誌

蠡城西數里青甸之原有姑若婦同穴而阡者爲太學生陳至仁之配劉氏生子邑庠生剛其配亦劉氏也於陳爲姑婦而於劉又姑姪之親也予先從曾祖少司馬良所公有孫曰某爲先伯考太寧公娶某氏生女仲予姊也而繼室至仁其婦則予之女也太寧公有文學行誼繩其先德故姊素嫻於閨教歸陳執婦道性勤警雞鳴而起督臧獲咸治其職事舅思石翁起家素封獨以內政委健婦錢穀米鹽之類靡不操其鍵而出納之惟允用是益以陳氏大生一子卽剛數歲而議姻予女則太寧公主盟焉及笄歸剛吾姊私以姪之親撫憐之特甚爲婦五年舅姑及太舅姑無不籍籍稱賢者相其夫子勤於學凡以吾姊之教也期年而生女彭又二年生子春又明年生子夏生夏將彌月以產疾死舅姑上下皆哀之思石翁曰入門五年而耳不聞有新婦聲姊哭之曰事我五年而無忤色其宗人因誄之曰孝哀嗚呼哀則哀矣何孝之敢聞及女死五年而太姑徐卒又五年而吾姊亦卒其年女子彭繼殤陳氏之祚非復向者三世伉儷蘭芽玉茁之盛矣里之人且有追吾姊之徽以及其媳者孰謂婦人女子不關門祚之興替也家司馬世道清白後人食貧姊自歸陳未嘗一錢私外家閒修鮮臠之奉於母氏取豆鼎而已臨終牀頭有金一鏹出以犒侍婢餘者歸其夫子其卓然不亂如此及其死也誄曰孝恭視吾女爲稱情云女之生也爲母章初乳及見予先貞節氏故名曰祖愛字貞元自少婉婉聽從授以論語孝經列女傳次第成誦頗知大義及其爲婦之日無

幾也故無善可稱然而不若於訓者蓋亦寡矣法不當天而天且亟予是以哭之哀又十年而哭予姊其感予懷當何如哉姊生於某年月日卒於某年月日享年五十一女生於某年月日卒於某年月日享年二十一姊葬於某年月日而其年冬後遷吾女之殯而祔之祔葬非禮也生而戚死而依情也是宜銘銘曰

人孰無姑婦而爾之生也同祖生孰非姑婦而爾之死也相聚孰為爾夫孰為爾子能不憾百年而心腐賴有斯文也以慰爾私還託爾以千古嗚呼懿哉永昌爾祐

墓表

累封太恭人加贈淑人劉母貞節周氏墓表

崇禎庚午十月

予與去非同舉南宮三十年出處去就多步去非後塵稱

同志去非少而孤育於母周太夫人以有成視予所遭又有同者憶癸亥同官尚璽時去非每念太夫人年高欲謝去已而竟去將發聞艱予為之分痛相別六七年又得聚首京師老而益親每論心道故忘其非同氣也久之去非遷南司馬行矣遂持太夫人狀而請墓道之文於予予讀之復痛痛去非之母似吾母也嗟乎非予又誰為去非道母德者因特表之墓道曰劉母貞節太夫人周氏女中鬢眉也有古孟歐之風焉生而端慧父曰鹿野公擇婿得贈公于歸若干年而贈公奮自諸生登隆慶戊辰進士世稱華江先生哀然儒者也未拜命以疾卒於邸時太夫人偕來京師所舉二子長者十四齡曰昞次五齡曰定國即去非也皆邁疾且劇二女子又殤太夫人且顧且號晝夜不

交睫而忍死以二子扶櫬歸涉江溯河凌風濤不測中幾
葬魚腹者數矣太夫人輒拿他舟載二子而身依贈公櫬
攀號以濟自此稍稍病悖病中取女紅自力不輟久之復
病痿宛轉牀褥三十年時誦佛號皈依淨土稱未亡人而
已初太夫人之稱未亡也撫棺而泣曰死非吾所難念君
讀盡天下書常扼腕當世之故頗欲有所發明而竟齋志
以歿吾姑留此身以待二子聞者哀之比二子頭角漸露
則次第授以父書誡曰在昔爾父坐一室披簡編如對嚴
賓耳目無他營卒底於成爾曹能如是吾亦何憂二子益
奮久之長君以萬厯戊子舉於鄉去非則遲至辛丑成進
士太夫人爲之色喜猶時飭二子曰幸有今日無負爾父
志可也其後長君自滕縣令考滿馳封積官至同知去非

歟歷中外遭時中廢會貞皇帝登極三起官至尚璽丞猶
不忍割裾太夫人曰三命異數也而忍傲之如臣誼何且
幸際覃恩進爾父清華亦慰吾志耳去非跪受教上京師
改官太僕少卿晉贈公如其官太夫人垂病聞之含笑而
逝乃者去非又以光祿卿晉贈公如其官且推贈公所生
如其官而去非自爲令積至今官所稱慷慨發明當世者
亦已見其大槩今而後太夫人可以報地下矣嗚呼一婦
人耳相夫有成矣又翼二子有成以繼志不愧其言如握
券而償生賢於死多矣撫棺一慟皎然志氣感天地泣鬼
神世以爲純貞其他婦德多可紀者太公卽世時贈公方
上春官諸舍殮皆太夫人身任之而衷於禮不遺贈公以
所憾其教孝如是贈公遊學昆季私析產太夫人持之不

得僅取所析之餘者示承祖意及熒熒撫孤之日昆季欲還所讓產不可曰此夫子志也其教弟如是伯翁守泉公晚舉子而有佚志太夫人身任母道閑之惟謹卒以成立其親族子女之無依者往往收撫之繼以婚嫁其教慈如是方歸贈公頗食貧則盡出其簪珥綺繒以椎布自前身操井曰既寡貧益甚日以女紅給饗殮且佐二子束修從師而口啖餽粥竟坐是以癯其教勤且儉如是節嗇之餘又得羨金稍拓廳事基曰吾後必大又喜周人急宗黨中諸爨火不能舉者病無醫者喪無具者率走向太夫人爲之經紀晚貴視二子祿漸厚益好施不倦未嘗讀書識字而能辨古人大義或以事質者得其片言冰解而去視二子所交客時從屏後偵輒知其端表卽端士勉具飲食資麗益非是坐趣之去其種種才識如是方之孟母歐母間當無所軒輊卒啓去非爲時名卿宜矣卒年七十八兩封太孺人進太恭人加贈淑人先是督學使者錢公檟奉詔旌其門曰貞慈榮壽而太守盧公復采懿行載之郡乘嗚呼視予在妊而孤長而不逮一日養終愧顯揚其親者竟何如耶因灑泣而系之詞附之碣後

古亦有言殉死非難孰解斯義乃筭者流生不讀書堅持其志志之所之精以誠通鬼神可避之死而生肉我良人重開國瑞厥瑞維何如璞斯剖瑚璉未試爰啓後人善貸斯息一本雙穗靖共司馬承考軼兄曰母所畀母今已矣若母吾母淵然雪涕

行狀

光祿寺少卿周寧宇先生行狀

崇禎辛未十一月

明興二百餘年至神廟之世士大夫涵濡於道化日久爭自奮勵進之爲功名退之爲節義爲理學文章彬彬盛矣然考其時大抵猶矜聲名聲名盛而標榜隨之遂有朋黨之禍君子惜之獨吾鄉周寧宇先生迥然自樹於風氣之外雖屢進屢退率隨所至爲表見而終不依附當世獨完大道於渾樸之天可謂蓋代典型後之論世者尚取衷於斯先生諱應中字正甫寧宇其別號也先世出宋相益公後自江右徙居睦入國朝再徙會稽從戎籍也始遷祖曰德轅公德轅生二菴公二菴生朴素公朴素生古愚公古愚生仁齋公則先生考也世有隱德而古愚公尤尚義好施人稱爲長者仁齋公娶沈氏生二子長曰岐山公次卽先生先生生未彌月而沈宜人殞於蓐育於伯母王宜人故伯考慎德公遂子之先生之生也沈宜人夢豸入室祥光迴繞而王宜人亦夢日投懷以是卜先生他日必貴先生生而岐嶷弱不好弄長勵志讀書至忘寢食屢應童子試不售而家貧無繼晷資度讀書無成兩父強之改業時年已二十餘矣有衛尉者以軍餘坐先生轉漕先生不應拘而庭辱之乃不勝忿棄其家北上京師落魄日久得給事少京兆府中治簡牘少京兆邢公見先生氣貌異之呼而前曰子嘗讀書乎曰然應舉乎曰然卽試以文亟加稱賞立進爲館師以其子受業焉竟以邢公得占籍順天補博士弟子員會予外王父章南洲先生以名儒開絳席都下名噪公卿間先生從之遊三年盡得其所學又與閩中

名士林璠及北地李海石輩下帷窟室學益進隆慶庚午舉順天鄉試明年辛未連舉進士時先生年三十二未有室也始聘里中陶氏奉旨歸娶未期而陶俎繼娶陳氏謁選授直隸元氏知縣先生起家赤貧十年顛沛淬礪冰霜又得南洲先生指授蚤已立志不羣矣既下車元氏則慨然慕古循良之績廉潔自持留心吏治所至與民興利除害無所撓避民以事至縣庭輒相與延問如家人卽受訊者多所恩宥所持三尺獨以繩豪右不貸一切苞苴竿牘不得至門居一年政績偉然有巡方使者駐元氏候代日久先生以邑小供應不堪一日饋進四菓曰棗梨圓柿巡方得之悟曰豈欲我蚤離元氏耶卽日移節去而心重先生遂舉以調真定真定隸郡下衝繁特甚先生一意爲民如元氏不以簿書期會擾民其最著者爲築城之役真定居京師右輔鄰邊徼無城歲遣防秋戍卒自別郡至者若干人則歲有戍卒金錢會承平日久秋防祇文具而所設戍卒金錢多屬文武吏士瓜分襲爲故事先生曰莫若城真定也亟請於當事當事爭難之度不效誰任辜者而太守某持之尤力先生請身任其役卽不效亦身任其辜當事不得已始聽之先生乃召邑中諸父老與謀計里而派役欣然受命因起土爲磚採石爲灰其衡量度數與良楛之品多先生手自監定久之城工成萬雉巍然甲於三輔僅取縣賦及防秋錢一歲而足上官大慚先生又疏滹沱河以通水利教民種稻田北方水田實自先生始其後徐尚璽貞明踵而行之邑患盜先生以保甲法清之有兄弟

三人爲盜者可得情特賞一人以全宗祧其敷政寬猛相濟多類此又言窮如水萬井風恬之謠會梁尚書有子怙勢橫鄉里先生惡之以法中貴馮保爲其父母塋地樹崇楔先生獨不署名並憾之切骨而江陵相於先生爲南宮舉主又嘗移書刺其奪情在位亦大恚於是向之爭言築城不便者咸以先生爲贊當大計遂誣以贓私過吏部堂堂上大呼曰周知縣貪先生亦大聲應曰知縣不貪顧問真定守守曰委不貪第坐傲耳乃調湖廣崇陽崇陽巖邑也積弊相沿閭左民爲勢家供繇役苦不堪則逃亡轉徙邑乃大困時朝廷有清丈天下戶田之令有司多文具應之先生徧歷窮鄉赤日中行隴畝揮汗如雨遂逐畝逐戶一體起科人無漏者而賦役以均小民如出湯火然勢家終病之有縉紳招飲投蔓毒害先生歸至夜半毒發一嘔而解先生亦不言第亟著冊而崇府審理之報至矣頃之上官已遣署篆者亟索篆先生持篆弗與曰公事未竟時庭中郎吏皆散去先生手自持篆印戶籍冊日夜以萬計目不交睫者浹旬冊成召主者一一給之又存冊於官以爲永憲而先生乃行崇陽之人至今呼其田爲周田先生又著便民三苦論言言可涕也後入縣志云庚辰大計仍以諸權倖下石復列不謹坐錮先生既歸田宦橐蕭然時慎德公已捐館而仁齋公遐齡在堂貧無以養也先生率陳宜人躬執爨以侍晨昏或時治圃與傭奴雜作所以承權者百方備至仁齋公亦安之忘其子之在錮籍也越二十餘年都御史艾穆特疏薦先生時陸莊簡公爲太宰

號憐才素知先生獨病察典二百年成例難破及得中丞
疏喜甚卽會訪九卿科道百口訟寃遂奉旨起先生原官
補直隸曲周知縣不數月陞河間府同知連擢山西潞安
兵備僉事故太宰王國光里居坐不法有司多不敢問先
生按治之王竟伏辜而其私人在朝者百足擠先生復論
調家居七年壬寅再起湖廣荆南道荆地臨長江漕舟時
虞覆溺先生酌爲帮運支收之法官民兩便之楚藩構亂
殺巡撫趙某獨憚先生威名聞先生至拱手就縛先生復
疏請爲未然之防在荆南三年於民生吏治無事不講求
旣一一得其要領則著風憲錄行於世而三年中所積錢
金以萬計悉推以惠地方或設賑民倉備賑或疏沙市河
澗涉或所在起義塚或繕城或建閘皆百世利也朝士有

知先生者內擢光祿少卿將大用之而荆州司理王三善
僉邪士也先生嘗以法懲其胥役坐憾及先生去任意以
大計中傷於史按君轉嫉南北交章復論調然公道愈彰
當事者方懸霸州兵備待先生需次巡撫先生曰吾老矣
不能事羣少年再辱也遂抗疏自理枉狀故事坐察無自
理者因奉嚴旨歸先生雅負經濟之畧雖遭中廢時時不
忘當世及再廢再起益侃侃發抒思得一當以展平生而
竟爲宵人所構不究於用識者恨之瀕年時事孔亟內地
戒嚴真定人多追誦先生築城功朝士傳之皆傾慕爭欲
推轂先生而先生老矣杜門卻掃不以姓氏通人間亦絕
口不道平生事卽海內知己如北地趙夢白吳中姜仲文
及吾浙丁長孺數人間相聞問亦落落間澗夢白起冢宰

嘗移書先生欲爲先生進一階先生不答及夢白坐黨人禍遣戍始答書唁之其介如此先生林居後終日危坐一編課子暇則覃思著述積至數百卷皆道其胸中所得與身所經歷處一字不蹈前人非文章非語錄信手疾書其深處往往與圖書之言相表裏一夕夢神人囑曰子著述盈箱盡洩天巧犯造物忌自今當還之造物弗著一辭先生懼然悟遂絕筆焉時戊辰長至前一日也明年冬先生年九十先期語諸子曰吾將歸矣及屬纊家人忽聞空中車馬聲填然而先生遂逝先生廣額豐頤神采英毅雙眸炯炯望而知爲正人其處心積慮動可質天日切切以康濟生民爲己任居恒抱拙自守若一無用於世者至臨利害遇事變奮然肩承百折不挫自少歷艱苦敝衣菲食於耳目玩好一無所庸登其堂凝塵滿座入其室殘書數卷而已蚤年意氣豪舉不可一世中更因折深自勵忽一變爲溫恭矯輕警惰時時若將不及顧專用心於內斂跡韜藏其深造自得有人所不及知者始先生以幼失怙撫於王宜人非爲人後之義也及縣令考滿頌綸命先生曰育我者已矣非一命無以慰九泉生我者尚有待也遂馳封慎德及仁齋卽世且無後先生從里居上疏歸宗并乞覃恩封典於所生朝廷許之因贈仁齋亦光祿少卿異數也子三人女二人皆陳宜人所出長惺例貢生後先生數月卒娶劉氏予族姑也生子熙乾邑庠生次正國太學生娶陶氏繼娶趙氏生子祖清祖獻次愧邑庠生娶秦氏生子熙咸祖茂女一適陶崇烈邑庠生一蚤卒先生生於嘉靖

庚子六月初五日卒於崇禎己巳十一月十二日墓在破塘里之某山陳宜人先先生卒葬已若干年自有狀至是啓壙以先生合葬則庚午之十二月某日也正國輩旣襄厥事乃手撰先生行實造宗周而請狀焉宗周不敏以外王父通家之誼辱先生愛最久誼不得辭敬爲之詮次如此宗周束髮侍先生以迄於茲每見先生進道之力歲異而月不同晚年德盛禮恭淵乎莫測涯涘窺其所得殆堯夫茂叔之流近世儒者不足道也近復得其遺稿讀之益爲之斂衽顧予猶自愧管窺不足模先生萬一尚俟立言大君子詳核其所未盡而誌之而傳之以垂不朽則世道幸甚謹狀

顯考妣行狀錄遺

先君子始從姚江諸伯泉先生授章句凡三年盡通章句之學先生古朴有學行晚年教授郡中吾宗前輩子弟多出其門者及宗周登第後猶及奉先生手範依依話舊不置先生時年八十餘尚爲人塾師無子卒
先君子稍長從孝廉車又新公學尋得病歸先外祖嘗言又新輕薄子無師範自後多從先外祖讀書

先君子於宗黨以文學最契者族叔太虛先生炯贈司馬玉笥先生熔總弟州刺史崑崙先生佳族姪震陽子彥玉笥尚通崑崙尚狷震陽愷亮而太虛尤古潔不羣語云觀人於其所友信然乎
先君子稟質最清癯然骨立其讀書不爲繼晷程往往猶夷自得若置若忘及興至則兼程而進一日千里

先君子工書法尤精於小楷嘗遺所業義經舊本其上有蠅頭字作詮解其字亦絕雅俊

先君子遺文多散佚一字不傳太虛先生嘗謂宗周曰爾尊人向有遺文在做笥中今亦無存者一日族叔斗門翁遺宗周一端硯頗古致曰此爾尊人物也宗周得之捧而泣如見先君子意先君子嘗與翁同硯席故遺之因藏之神厨永垂子孫以爲宗器

先君子遺像有折桂圖蓋弱冠時良工錢述齋所寫丰神濯濯如藐姑射之神恍垂雲氣而上始宗周弱冠人或見之曰酷似乃父而清肌鶴立過之

先君子最工日者言丙子秋試罷歸自課曰吾殆將死矣祿命中財旺甚不發身何以厭之

太恭人幼發痘瘡甚劇餘毒中手腕百方療之不解後逢一老人指授曰以鱔血塗之瘥已而果然而兩腕屈伸稍攣成痼疾體亦坐是羸然豐頤廣額端靚出羣儼然山河之度故先生蚤卜以貴

太恭人始舉第一子週歲殤後乃舉姊及宗周太恭人處外家紡績所積稍有餘貲委舅氏生息又益以仲舅所資手置腴田十畝遺宗周至今瞻養藉之

宗周少時見太恭人未嘗衣繒帛舊帛數事皆藏以嫁女兄及宗周登科後嘗市一粗繒奉以製衣太恭人曰余無用此盍攜之長安爲薪水資乎蓋宗周再上公車時也太恭人御寒止一敗絮縷縷成百結一被縵更甚問之曰此絮已三十年終其身不易也

宗周既上壽昌後太恭人在外家始分爨自食以一婢子給薪水日僅再舉火或朝爨餘暮食或暮爨餘朝食

右行略述於天啓丙寅正宗周席藁待罪之日明年丁卯秋今上卽位戊辰改元崇禎其冬宗周卽廢籍奉詔起官順天府府尹己巳冊立東宮覃恩晉贈府君通議大夫順天府府尹太恭人爲淑人而故官所奪誥勅奉詔補給宗周乃於庚午秋日謁告歸里焚黃墓次并告宗周前日所以得罪之故以請罪二人欲死者有知重開白日因再請當世名公表題神道以垂不朽嗚呼今而後宗周何以效二人其在蓼莪之卒章乎其在蓼莪之卒章乎

傳

族父學可公傳

天啓乙丑

宗周近輯宗譜見先世有日涉翁者其行義爲先少司馬良所先生稱述輒嘆慕不已以翁之德卽託志園林如靖節宜必有福祚流於子孫可操券而俟及夷考其苗裔何寥寥也翁八傳而與予同輩稱孫枝者僅五七八其世嫡曰應麟麟之考曰學可公亦以行義聞宗黨而父子間式微日甚伶仃一綫苟延門祚薄田不能給飢渴傲廬不能蔽風雨一二期功之想又無論也予於是不能無感於天人之故予先所自出曰遂安卽翁之仲兄嘗三上黔中脫父戌世傳孝子其後發子友于丁衣冠聚族人以爲有天道翁大節讓其兄成名而始修篤行不愧其兄至食報後人若霄壤豈天道有定不定耶抑一乳而分抱於此注於

彼耶公謚壯字汝男學可其別號世爲出陰水澄里人始
遷祖曰文質公而曰涉其曾孫也公祖曰西橋公森蚤世
配王安人勵節撫孤鄉里稱之老曰淵泉公庶配傅氏生
六子二女祖考皆世有隱德而公加耀云公生有介節於
聲色貨利處之淡然方盛年僦館於僻巷隣有婦殊色忽
暮夜寢室壞婦覆其下創甚大呼劉君救我公趨而掖出
之時月色正皎四顧寂無人婦啓公無遽歸請逮於旦公
辭之婦曰非有他意處覆巢之下心神惶怖稍仗福人護
持耳公許諾對戶而榻自鳴衷曲至曉不二婦乃謝曰古
有展禽氏君得非其後身願君世世受天之祐公曰某固
願學古人耳因自號學可自此公意欣然若有得也益向
慕古人之道而學之因默坐一室左右簡編經數月不出
檢身益嚴日遠於非僻之習自燕居幽獨推之六庭無二
屢要在不欺此暮夜心而已如是者數十年人未有知者
家貧歲爲人塾師資館穀以養未嘗有戚容篤於事親及
母病劇嘗割股和粥以進母飲而甘之翌日乃瘞及喪父
公方出遊在外忽一日心動趨歸父病革矣踰日乃屬纊
哀毀終喪猶以無財不能爲禮爲恨至飲之終身遇諸弟
妹友愛如孺子患難相恤不避湯火迄今再世合食人無
私財子無常父皆公之教公之學其可見於躬行者如此
雖未卜其道之有聞與否亦異乎咕嗶自侈繁多而實寡
者矣公蚤業科舉業有聞及一再舉不售輒棄去以處士
終享年七旬卒於萬厓丙辰八月二十八日而距其生則
嘉靖丁未八月初八日也配顧氏生二女一子子卽應麒

頗能繩公志卜其後當有聞焉吾知公之學行且日光而日涉翁之裔未嘗不積而大也此予所謂天道也

族子宗周曰刳股而傷生逮婦於且而至於瀆禮皆道之所不載而公安之正坐未嘗學問耳公有感於是始有意於學而猶未卜其道之有聞則學亦難言哉昔孔門論孝弟爲求仁之本而中庸言上達天德乃在屋漏不愧始知乎此者雖謂公爲知學可也

舒城丞章蘭臺傳

崇禎癸酉

吏道雜而多途一時布列州縣者自一二長吏外率皆市井無賴以錐刀爭利其黠者見事風生或假上官威鈎索鍛鍊致人於死空人之家取其貨財任滿則飽橐以去無孰何者卽其民亦相與習之而不怪又其弊也長吏爲衙官之行其乘權藉勢尤甚致衙官反得施顏面以益肆其惡於是天下遂無吏治而民生繇以日困噫此詎可令吾舒城君見乎余母族有丞舒城者其爲人天下長者也其丞舒城多惠政閒從其嗣君綬得一二事狀輒爲之擊節嘗有直指使按所屬道經舒城君郊迎有奸民遮道訴邑人王姓者不法事直指動色卽屬君領健卒往收之君從容進曰某誠不法恐一時膚愬難據藉令果有之牒下縣官以一卒呼之足矣無事丞往直指躓其言不果行已而廉之訴者固坐仇思利其所有故也邑人金姓者家奉佛日誦經爲齋供事會白蓮徐鴻儒作亂遠近戒嚴仇持金姓者因收其繪像來告君給其人出而遽焚其像左右曰柰爲姦人藉口何公曰留此像則人情蜂起地方從此多

事吾爲地方弭亂耳違計其他聞者嘆服長官衙舍失盜君司捕囑刻期得賊頃之無耗捕役懼罪因妄指一富人爲主藏者曰往按其贓百千可得也君按之竟無左驗或曰可治以三木君曰事出風聞奈何遽以刑楚之吾寧失賊受過而已其後長官亦不復急治賊所全活無辜甚衆則君義感之也在舒城三年其行事多類此而榜其廳事之後軒曰思過其守官清慎如處子每行一善政邑之士大夫或進而交賀於庭君顧惘然如有失也後左遷衛幕以去君遂不仕始君家貧治舉子業不就去而游京師削刀筆給事邸第者十年歸奔二人喪已又之京師出爲長蘆鹽司書記時鹽司主者瞿公汝稷賢者也頗繩主曹胥史以法無貸而獨心重君每事依若左右手君益不忍欺瞿公富商胡龍山睚眦殺人嘗憾一族弟欲致之死會事發鹽司胡以五十金及釵幣來壽請君爲地君不可惕之以禍不可一日君出休取道近胡所居有數人先要於路掖之見於胡胡款宴久之申前請且許倍原賄君謝曰人命至重錢幣爲輕吾終不以所輕枉所重且爾身擁高貲不思爲子孫樹德而增修其怨無乃不可乎胡曰吾力固能生殺人當途之與吾善者不能以指屈也君卽厲聲曰任君爲之無俟我矣遂辭去後胡竟置弟死君得不累有同事者郝某以鹽稅缺額若干坐贓永戍君知其枉輒代爲假貸完稅額得免於坐已而郝又困於償貸者君多方爲之代償焉君所至好行其德如此歲乙巳君年六十三忽夢兆一物蛇尾龜身伏於前寤曰歲其龍蛇賢人沮

今又夢及之余殆將死乎至期盥漱取朝服加身而逝且謂其子曰吾少爲血性男子恥事委靡黽勉小就至此然迴思平日所行事亦無多恨嗚呼信哉以君視當世若曹真猶孤鳳之鳴羣梟也君章氏諱冕字周臣別號蘭臺天性孝友所積俸皆半散親族貧者鄉人尤稱之而表異乃在舒城故鄉人至今稱舒城君云外史氏曰自世重科目而吏道始厯士之以他途進者往往居天下之下流至積重之勢極人情之所趨下流反在科目上他途卽委瑣齷齪其不肖者亦僅如科目而止而其賢者往往阨於下位不得志如舒城君者豈少也哉豈少也哉君之先有滄洲居士博學善賦詩有高行與蕭山魏文靖公友善國初舉賢良不就以布衣終身文靖稱之曰隱不遺親貞不絕俗滄洲之謂與章氏同時又有坦菴冰檠南村數先生與滄洲齊名當是時士豈以科目重哉

共姑傳

共姑者王父兼峰府君之女而宗周之姑也姑生六歲而陳安人卒育於大母茅年十九歸章立鎬時章門方汰而吾家中微非匹也甫入門卽失姑母歡姑沈侍御女孀而悍視婦椎髻而服練則女奴畜之日開釁鎬亦不禮焉沈乃錮姑別室聽鎬出而私外婦沈私其外婦猶婦也而益虐其婦朝一盂飯夕一盂飯穴而入日不一飽姑處之惕然分也而恭順有加口無嘔息聲聞戶外且日理麻臬組紉之職以爲常沈稍稍感動雖妯娌及往來鄰媪見之無不泣下者由是出姑呼鎬前復行同牢之禮頃之鎬坐外

婦故復不禮其婦還開釁其母又錮姑而虐之如前狀久之解又出姑呼鎬爲夫婦凡三爲夫婦而姑始成章門婦會沈且死矣自此鎬出入內外姑浮湛而已姑羞之亦不禮鎬鎬不悅竟以流蕩破其家姑始操家政黽勉力嗇無可爲者猶思以禮教延家聲每伏臘祀先歲時問遺親故皆有節姑取諸女紅或脫簪珥佐之鎬不一問也聞之或反以爲恚晚年益窘竟憂悴以死猶手遺餼粥田十畝聽鎬一朝而盡之亦死所遺三子皆側出姑撫之如所生所生者二女子宗周少時從祖姨陳道先姑姑婦間憂釁狀甚詳姑之幽囚而不死且不至終遂則陳有力焉及宗周旣長侍姑幾二十年絕不道平生一字晚年偶及之方一二大畧輒捫舌曰天擊我矣一揮涕而罷且曰吾平日不言而今言之何怪也吾死矣夫已而遂不起嗚呼以予所聞見我姑平生何異詩人之詠綠衣我思古人俛無說兮我姑之謂乎求之圖史蓋姜詩婦鮑女宗之流孰謂古今人不相及宗周追感其事因私謚姑曰共而傳之祖姨陳卽陳安人之妹孝廉章孝泉公之妻而於鎬族也孝廉死姨操方嚴以節行著云

贊

張守齋像贊

崇禎戊辰

行方而嚴制禮則謙學博而偉厥用則潛故所至望風郡邑奉爲師表而王公失其炎炎嗚呼先生不知其人視其所自占曰守之云乎庶幾守道不回古之矜而廉也與

祭文

祭趙儕鶴先生文

嗚呼莫高匪山厥宗岱華先生以之峰巔高跨莫浚匪川
 其流河漢先生以之澄襟浩瀚偉哉先生曠世人英卓犖
 不羈還就準繩子長之才希文之志北海風標東山韻致
 蚤踐銓司孜孜品槩洞觀消長深惟否泰六計是澄羣小
 所覲滄桑幾更屈指癸巳晚年一出銳意太平激揚進退
 仕路以清庶幾慶厯君子滿朝旋開黨釁席卷風颺辭連
 察案禍酷身家蕭蕭白髮萬里黃沙怡然就道視險如夷
 執戟待盡丘首何期卓哉先生始終一節為國樹人歲寒
 冰雪胡不慙遺再逢明聖天網新開秉銓誰競回思哲人
 愈增嘆息悠悠世道曷知其極嗟予鯁生慕交英俊晚獲
 同朝惓惓後進登先生座光風吹鬢叩先生音蘭芬玉潤
 退而惘然消吾鄙吝一日歸田銀臺三晉昌言不足手書
 以訊國士遇我一官相殉魂夢徒勞慙慙在疚雲山萬里
 遙聞旅櫬先生已矣我來趨覲生靈北心致君堯舜

祭孫師母徐夫人文

崇禎辛未八月 墨蹟藏復祭家

婦人之德未有不托男子以著者蓋其順承天之道則然
 蓋坤承天之義而益彰昔我先師起家翰苑游陟台輔掌
 大禮則定策兩朝使宗社奠於泰山秉大政則作孚一德
 使身名光於霄漢人僉謂古大臣以道事君不可則止如
 是意者雞鳴交儼之地有夫人以承助者素可知也先師
 端凝忠介得之天植其立朝之概宜非婦人女子所與知
 至於身沒之後家無餘貲田廬仍先世之舊子孫絕純綺
 之風宗周每益嘆服先師德操卓然不可躋及而苟非夫

人以一德相承終身率其椎布之性亦安能不於中預爲之地世不乏名公卿以羔羊之節著天下而不能一一得之於家庭至於蓋棺論定之日遺金遺囑猶不免以內人分過刑于寡妻之謂何方之先師何啻硤硤之於美玉乎則夫人之賢信有不可及者矣非夫人不能成先師之德非先師不能表夫人之賢此所謂相得益彰者乎完名景福八十考終冀先師不而夫人從此與先師俱不朽矣會宗周爲先師手錄士頂踵髮膚皆非我有戴先師之德則戴夫人之同德靡瞻匪父靡依匪母三十年於茲至向所爲寸草之將則寸草無將平生樹立半是浮沉寧不重遺師門之羞而今日者二人偕往之際能不撫心而一慟乎

祭周中丞文

嗚呼同榜兄弟異姓骨肉廿載交情三年別夢弟將何以哭吾兄憶辛丑之役與兄同出姚江之門聚首無幾未深相識也後家居久兄以外吏入爲御史辱以聲氣相聞結爲同心此兩人論交之始尋薦弟起官見於京師懽甚日爲造膝談談時務如畫而兄以御史指斥朝貴大憝者數人罷去其黨因媒孽正人日急兄與同志諸君子並受齟齬得例轉以去弟亦謝病去不復起而兄浮沉藩臬間久之率越歲相聞憐弟貧必分俸以贍將十年天啟改元召兄爲太僕出撫江南而弟亦起官儀曹弟嘗上書指斥逆璫亂政漸見曳轄兄自通州遺書誠弟曰戇言如是虞禍及也盍去諸頃之弟去見兄江南會地方有浮取上供歲

額者兄悉裁之共事大璫憾甚借隙郡丞兄抗疏劾大璫至六得免郡丞則弟實愆患之兄既忤共事璫因忤中璫賢而門戶之禍復起於朝士向所論去大慙皆用事遂逮兄詔獄拷死當是時秉憲中臺請除君側之惡不勝而死者楊公也秉憲外臺請除生民之賊不勝而死者居公也兩公地不同而事同同事同心亦同道忠肝亮節分席競爽炳人寰燭千古亦復何憾獨憾弟不才用兄言而不死還用弟言而以兄死言一也而生死之位異人心得無變乎則又何用此生平出處語默無聞為此弟之所以抱痛於今而不能已也嗚呼慟哉燕山寒兮白日闕嶠峩兮雲連纍臣來兮何罪魂歸訴兮中涓慟懷人於萬里感余夢兮霜天儼王陽之在位視鮑子之分膺將握手而從之也共命以周旋余既坐君門戶君坐黨兮臣璉苟李杜之齊名雖駢死以何言孰是死而不瞑控上帝以誅賢日月晦兮重朗雷霆擊兮雨露鮮幸吾皇之建極錄死節兮堪憐恩綸兮游申生氣兮凜然作保障於江南在文襄忠介之間

祭吳磊齋文 乙酉

嗚呼死生亦大矣而自知道者觀之不過一晝夜之序通乎晝夜而知死生之說矣又曰晝觀妻子夜卜夢寐今也何幸幾得之先生先生之於宗周固非有生平之契也登第之時忽形諸夢寐焉且誦文信國零丁洋詩句以贈而竟不知為何許人曰隱者劉生也夢覺而懼然先生心識之二十年來不輕以示人及夫晚年宗周幸辱先生同朝

相見如平生先生曰攝予爲宗周也未幾而予罷官去先生愀然不樂曰劉子隱矣予獨留予其不免乎因稍稍以舊夢示人人或異之者昊天不弔今年春先生竟遭國難以死零丁之兆信不誣也然則先生其信國之後身乎當筮仕之初而神已告之獨其假及宗周姓氏始終不解其故意者天以宗周賜先生則先生忠義得之性成初念之說豈果待宗周而始決抑天以先生賜宗周而先生死矣後先生而死者其爲宗周乎嗟嗟死生事極小聞道爲大等死耳而先生死忠卽等死忠耳而先生獨奉其初念以死絲先生之言邈其平日久已勘過妻子夢寐兩關至此從容踔絕義盡仁至頡頏前人庶幾朝聞夕死者與如宗周隱不成隱見不成見可以死而不成死長夜之夢自今伊邇先生幸有以覺我矣今者追欲叩先生而無從也臨風灑淚借束芻以陳詞冀先生之惠然嗚呼一死一生一夢一覺撫成言兮恨離索留此公案兮萬古如昨

劉子全書遺編卷之八

邑後學 沈復粲 編輯

文編六 劉氏家傳

幕公世家

山陰水澄之有劉氏也自縣幕公始公諱文質不詳其字號先世廬陵人至公從父徙維揚元大德中舉才幹任山陰縣幕官幕官即今制典史司一邑戎事以隸於令而公在官頗不詳其狀考之邑乘亦無及者蓋勝國時文獻闕畧不傳云其遂家於山陰也意公固嘗有惠政及民而民思慕之不忍去公公亦不忍去其民乎不然當亦愛吾越山水而卜居者也或云卒於官其子家焉考公大德時任山陰距卒之日為至順辛未相去二十餘年其非卒於官

可知胡運方與乾坤在晦冥之日賢人君子爭懷遁思如所謂晨門抱關踰河蹈海之類所在有之公豈其人乎然公雖輕去其鄉而避地而得樂士卒以開基後脩此其志量之宏偉固已加人一等矣公既歿子孫乃大顯於皇明迄今稱於越右族則公之積德鍾仁遺我後人以數百年之業又當何如者公所著有水澄家譜而戶部尚書宣城貢師泰爲之敘亦足窺其開業傳世之槩云公生元世祖至元壬午享春秋五十卒葬會稽石橋塢之陽遠系出漢長沙定王發後也至宋有退翁先生者嘗與從父忠翼大夫通判廣德軍確分鎮浮梁被賊陷竄居廬陵城西再徙青石原門然竟莫詳其始遷淳祐時擢朝奉郎國子博士忤時宰史浩坐廢因號退翁娶姚氏生二子應真應清清辟明經不起娶徐氏湯氏生子漢臣登咸淳乙丑進士任評事娶繆氏生子廷玉辟明經官揚州別駕娶楊氏生公而別駕卽葬於揚州公自揚州來山陰故世又稱維揚劉氏自退翁而上曰偉曰倫曰性曰才曰獻曰習又數傳而上曰頌曰棊授受之間亦已荒矣君子存而弗論焉可也詳見前淵源考中

家史氏曰邑幕公卜居水澄蓋郡城中風氣最勝處形家者言城南二水從南堰水扁兩廓門入北流數里至此交會其水澄泓不流故名而劉遂托以日大迄今三百五十年水澄一帶門第相望近百餘家無一他姓錯趾其間者又分之爲新河西小路以往不可勝紀所鍾人物亦往往碧映寒潭春融四澤不負地靈然水性下及其波也一變

而浮薄再變而陰狡不測水澄水澄用爲詬府噫嘻安得迴東下之瀾進而遡我祖淵源於旦暮使名家名里永永天壤俱傲乎

昭父審臣列傳

昭父公諱子華行華二晚自號適可居士縣幕公孫也縣幕公娶陳氏生二子瑞卿瑞吉卿卽公考公負異才博學工詩文援筆立就而行誼修贍尤爲鄉里所推元末天下大亂公抱道隱居不仕嘗以春秋教授里中里人多從之遊者皇明高皇帝御極八載乙卯以經明行修聘先是洪武四年辛亥始設科取士明年壬子連舉鄉試至是罷科舉行薦辟復古里選制一時號爲得人至洪武十七年復行科舉遂爲定制而薦辟之途訕矣公旣應聘出以布衣

陞見會大將軍常開平北伐卒於師太祖哀悼命廷臣賦挽無當心者因以命公公立賦曰揮戈十載定河山忽報星沈易水灣馬首西風旌旆捲天涯落日凱歌旋功成楚漢興亡際名在韓彭伯仲間聖主思君心獨苦黃金直欲駐真顏太祖咏至末句不覺抵掌曰得我心矣隨命吏部銓除得大興同知後改青州府推官致仕洪武辛未卒年五十八載郡縣各志縣志稱公在官多政績然不可得而詳矣其晚號適可也疑公在官亦不久流行坎止各適其可因以自况公其始終樂道忘富貴者耶公承邑幕公後重修家譜其詳畧去取頗有法天台王俊華序而稱之詩文多不傳自應制外又有題金焦二山圖云風塵何處是蕪城客裏披圖似夢醒一水自分天下勢兩山不改舊來

青相如浩氣吞雲夢杜甫詩名壓洞庭我有長歌空激烈
幾時回首重揚舲

嘗臣公諱諤行富三公自幼聰敏過人長而傳昭父公家
學因友名士朱文淵輩相砥於志節洪武二十九年丙子
以書經舉浙江鄉試明年丁丑舉會試天子臨軒策士公
奏對其畧曰臣聞古昔賢臣之爲學惟在助君行道立身
揚名而已是故固其志於時機未至之先必行其志於時
機既至之後上有以助吾君下有以安乎民所以身榮當
世名垂永久也臣請得而申言之夫人生於天地間必志
爲天地間用故志於農工者必盡其農工之理而後有以
享其利志於商賈者必盡其商賈之道而後有以樂其成
況士君子之志於助君者乎是以當其時機之未然也爵
位之未至祿秩之未加則必格物致知誠意正心以養其
達之所施焉及其時機之既然也爵有所以貴其身祿有
所以給其家則爲上爲德爲下爲民而施其窮之所守焉
若禹稷皋陶伯益之於唐虞伊尹傅說周公召公之於商
周莫不精白一心以盡其股肱之任夙夜匪懈以盡其左
右宣力之責所以張君之德布君之仁補其不足而節其
有餘安蒼生於市野而躋天下於雍熙也三代而下世有
其人姑舉其大者而言若蕭曹丙魏之於漢房杜姚宋之
於唐趙普范質張齊賢呂端諸子之於宋載諸方冊昭如
日星功澤施於當時聲名留於後世皆其志於助君安民
之所致也古人有言曰有志者事竟成苟或志有不固則
勤於始者或不能不怠於終得於先者或不能不怠於後

欽惟皇帝陛下以大聖之德居大君之位宵衣旰食惟思得賢以爲之助奈何學者承胡元汚習之後以經書專記熟爲奇其持心操節之道畧不究心所以罕遇良能多逢不律以興皇上之慮雖然有一代之君必有一代之臣皇上大敷文教丕變胡俗旣建學立師以養士於先復設科賓興以取士於後化誨非不至也戒諭非不明也有志之士孰不觀感興起思有報效於萬一哉擢一甲第三名授翰林院編修是科得舉者皆江以南士北人落籍者訐考官私其同鄉太祖怒逮學士劉三吾等下獄復命翰林儒臣張信等覆試諸落第卷公等一甲三人皆與中試者又六十一人皆北產夏五月再廷試賜韓克忠狀元時復有訐信等較閱不公者上益怒取信等極刑公及榜首陳郊皆與於難而三吾以老謫戍或曰公與郊皆安置威虜尋赦還爲司賓司儀署丞復殺之時年三十娶未詳或云未娶自此昭父公無後矣墓在石橋塢疑葬公衣冠初郊善數學方應舉時預卜今年狀元當刑云朱文淵字叔龍嘗從昭父公學後以太學生上書陳時政觸諱戍邊赦還宣德中薦起歷國子學錄所至著風采

家史氏曰劉氏入國朝昭父公父子並以名世之英遭際風雲驟蒙簡擢而惜其不究於用審臣公竟罹奇禍豈是時景運初開入文之氣鬱勃未舒如朝曦欲旦而反昧我公適當其阨耶雖然公所謂見危授命者以視昭父隨地自効始終君恩均之不媿臣節先司馬嘗稱公英偉挺特其制策立志高議論正其敷宏治理切中時務皆可措之

於行非迂談佞詞者比而其文如太羹玄酒不假調停滋味具在按司馬舊譜載公死事云公既拜翰林改東宮司儀官命閱歲貢文卷有貢士不簡觸諱遂連及舉主所云貢士疑卽夏榜取士又東宮無翰林司儀者疑卽司賓司儀之訛公故從史官後也而種種傳訛若是至後人益訛今考之國史及王弇州所著史料臚是年科場事尤核因改正如右

謙齋遂安列傳

謙齋公諱謙字惟恭行富一考曰芳齋初縣幕公二子長瑞卿傳編修公無後矣次瑞吉生芳齋公以及公而芳齋當洪武中坐市民充吏法入戍邊得貴州之烏撒衛國法充吏許鄉井之力田者而禁市民至今吏途初試稱農民

以比時公甫踰冠始率其弟遂安往來貴州供衣履已復命其仲子壻從遂安上貴州壻死於途相傳溺孟子河未詳何地其後芳齋竟得歸老於山陰則公身代之役矣久之公遂死戍所少子圻奔喪返越葬雄山或傳公以督運死京師未詳孰是死戍死運總之死孝云公兄弟兩人戮力周旋於萬里間關之際而公獨父子殉死越二百餘年人無傳者竟讓其弟遂安成名豈其後人有顯晦之殊耶一日宗周有修譜之役既反覆兩公生卒少長相距歲月又訪公之後人因追想當年心事出於公者有如此而猶惜其不盡傳於後世也嗚呼古之忠臣孝子一瞋而萬世不顧甘心與草木同腐者豈少也哉豈少也哉公生元至元庚子卒於永樂壬辰享年五十三

遂安公諱謹字惟勤行富五少謙齋九歲生有至性鄰年
痛父芳齋成貴州問家人貴州何處家人遙指西南天輒
遙望西南天朝夕哭拜已而公年十四矣會伯兄治襄寧
親公泣曰余獨非人子則慨然願與伯偕行家人憐而固
止之弗顧也是時南荒初靖道路荆棘行六越月始抵貴
州所至艱辛萬狀遇父於逆旅父子兄弟間相持慟哭行
道悲傷居久之年漸長父患瘋痺公欲以身代而法當坐
長兄公歸攜其兄之子以往而兄之子又卒於途居久之
復歸悉鬻其家貲以往更謀所以代兄者其事祕不傳凡
三返貴州遂得歸芳齋公并全伯兄之後世世云時家徒
四壁矣公色養愉愉計所以寧親者百方迄於壽終公嘗
居其所居之堂曰遂安言遂親安也及父歿因以自號以
志思久之公亦歿遂安堂之名始膾炙人口一時縉紳先
生如司馬恂朱文淵輩皆有記有詩而副使張倬特爲公
作傳公之孝行大彰至萬厯中同邑張文恭修郡志列公
孝義傳中士大夫聞之又多樂道其事者於是海內野史
稗談競傳公事以爲異公卒於宣德癸丑春秋六十五墓
在亭山朱家塢附厥考也

家史氏曰昔人有言死天下事易成天下事難雖然未
可以優劣論也芳齋之成也有謙齋公以殉父則有遂安
公以全父時與地則然各成其是允稱二難其後遂安累
葉顯融人以爲孝子之報而謙齋獨否將無積厚者流光
抑之愈久而愈不可量乎按郡志載遂安初上貴州在伯
見身歿之後訛甚今改正如前

日涉公諱訓字惟授行富七芳齋公少子也少遂安十一歲芳齋公戍時公方在襁褓比稍長聽二兄出入黔中而公一意居守董家政又罹翰苑公大故家難相仍劉氏幾不能立門戶矣公承父兄之後斬然立家法爲經久計思以振其中衰首立公田若干畝爲軍宗湯沐費而酌爲迎送往來之禮且以兄弟分三宗歲三週每宗一人遞掌之積田之所入以儲用無僭匿擾害其間者至坊頭里役十年供應咸有良孽里中效之一時官府爲之語曰他家有官法爾家法更不勞力至今越中輸糧官斛稱劉芳卽指芳齋所遺云公性嚴急待子姓不論賢愚親疏有過輒詰責中庭行事剛勇見人爽快明決以量而交或突梯滑稽嗔訾喔咿之流深惡痛絕惟恐逸已然出鄉閭行者相戒曰稍避三老丈莫得與之比肩其褊介潔特有如此者自號日涉取陶靖節歸去來辭語亦頗見其風尚公卒於天順戊寅享年七十九附葬朱家壘仲子璵璵子鏞純愷謙下平生與人無過言以勤儉幹前人業年八十鄉飲敦請三賓之末卒而鄉人題其丹旌曰仁壽

家史氏曰劉氏一代家法大抵粗立自我公傳世旣遠族屬子孫猶然動色相戒曰日涉翁日涉翁言嚴不可犯也易曰家人嗃嗃悔厲吉我有焉公嘗本昭父公遺譜更加續修用工書善繪者錄其世次摹其圖像裝成方帙藏以漆函傳之子孫子孫祕不以示人近宗周取而閱之則見其系世自晉水衡都尉公衍凡二十傳而至宋忠顯公

韜又十一傳而至退翁先生禮又四傳而至縣幕公文質井井如也圖像則自忠顯公以降至編修公凡二十幅儼然生氣奕奕如也其用心亦可謂勤矣然劉氏自退翁先生以來世傳出自長沙卽昭父公譜敘亦然而晉水衡都尉公出自中山靖王勝見於建寧東西二族譜者昭然可信也公胡爲而援之乎善乎昭父述譜之言曰所同出者雖遠而必錄所異派者雖近而不收余請以爲法

素菴列傳

素菴公諱玘字文玘行貴四遂安公長子也公德器朴茂一意歛華就實以率遂安之教而立身尤方正不苟居恒寡言笑及對衆吐辭確而厲聽者悚畏御子弟威克厥愛門內之政肅然每偕二弟商榷家務二弟皆侍坐唯唯不敢先出聲有問則對而已下逮臧獲尤以嚴勝分職受事各奏以功而公更謹身節用以先之用稍擴前人之業已而大饒嘗爲里中萬石長率斤斤奉法將事致公無逋租私無加賦里中戴之癸巳越丁酉連遭大祲公捐餘困出賑貧乏者全活頗衆有司循恩例兩以冠帶褒榮公輒辭至郡守以鄉飲延公亦執謙不赴士大夫益高其行公平生雖不事咕嗶能通曉大義動合儒矩遂安公雅不喜佛老臨終勅公曰吾家世儒術不事虛無吾死汝無邀福非類以益吾過公慎命終喪無違禮母宋安人枕沉疴醫禱弗瘳乃刲股和藥以進而逾愈人多其孝感歲時祭祀必致恪備物務極豐潔遇朔望輒焚香告天曰行有不義神明共鑒之又常於常食案上刻居安思危四字取以自警

卒年八十一時爲成化壬寅祔葬朱家塢

家史氏曰按先司馬嘗表公墓曰自古無不亡之國不敗之家其歷世綿遠必有所自周以農桑歷數八百中州呂氏以忠孝累世不替我素菴勤儉起家相傳大宗小宗不可勝紀亦其明驗頗足發明公德乃其一生家法尤在居安思危四字易曰危者使平易者使傾進而求之凜乎丹書敬義之旨盤盂几杖之銘也勗之哉勗之哉

謚菴希靜列傳

謚菴公諱鏐行金一謙齋公之孫也公爲人胸次廓落不羣喜吟咏尤喜七言律角巾布袍恒以自榮始公娶於張與內弟士昭同師劉半齋一日遊蘭亭請曰永和記昭明不入選信以天朗氣清類秋景耶又曰古人讀鵬鳥賦一死生輕去就今逸少曰修短隨化終歸於盡較之後更無著果然乎半齋聞其言而異之顧謂士昭曰君家玉潤郎其可輕哉公嘗上貴州供宗人軍需因而歷荆門泛洞庭入沅湘達彭蠡抵金陵縱觀東南之勝所至會心輒有題咏年七十四卒

希靜公諱漳字文淵行玉六遂安仲子樂善公孫也公生有高趣博學工詩時與友人相唱和每酒半卽席賦韻韻成各歌一闋陶陶然至興盡乃止而褫躬力敦古道恥以流俗自溷獨與鄉先生秦公世濟相友善及公歿秦公特爲序而贊之以傳公嘗究心於岐黃之術晚年大行之東陽諸暨間卒年五十二

家史氏曰舉世溷濁清士乃見兩公並以高識遠韻養晦

邱園一詠一觴邈然利達雖狂狷異致均之翩翩濁世之逸民也余獨謂古人讀鵬鳥賦一死生而未知死生之說爲何事猶之無著謚菴公其謂之何

檜菴怡軒列傳

始居賢公年二十餘而自越入黔萬里奔父喪人稱謙齋有子既而于役成籍者復死絕所司行原籍勾取嗣丁則謚菴當行而居賢之長子曰檜菴者慨然曰昔吾先人父子兄弟爭死王事今忍獨累吾兄乎於是檜菴與謚菴同上貴州而素菴之子怡軒亦偕行卒定其事而返自此吾宗無上貴州者人以此多檜菴之義又稱不愧居賢云檜菴公諱鑰字克銳行金四爲人倜儻身長八尺餘議論風生喜爲人排難解紛里中有不平事輒武斷或意氣感發

暗啞叱咤人不能堪性敏好吟咏亦借以嘲噓時事短篇長曠動關風化家貧而喜賓客至傾囊解衣弗顧也即妖有婚喪不舉者必告公公必曲爲之區畫得當乃已景泰間閩寇葉鄧二渠作亂檜菴接襄城嚴郡守白玉領所募民兵至防守地方飢疫屬道白鶴鵲不測公時以長從役轉餉至承簡脫白於死公德之比還郡不食其報公接公而歸爲年七十六歲已入長史玉公之海稱公有百豪傑士之風

怡軒公諱鑰字廷振素菴公長子也素菴四子而公尤克身並世家素封公性樂施予族人及故舊貧乏無歸之者秦與之貸不能償者輒焚其券是時歲飢弟養拙質軒皆

奉詔給粟二百石行賑授散官而公獨不居其名時時委
諸行陰德故人元難之同邑故尚書王鑑之志其墓稱公
曰徵君周是故云公後以孫棟貴贈太常寺卿改贈南京
兵部右侍郎徵君之稱爲左多矣公坐貴州之役以勞瘁
得疾卒年四十七生三子濟澤漢濟卽宗周之高祖而
遂生無是爲司馬公墓在州山里之座山

家世氏曰杜龍公布衣任俠守司馬亟稱之若吾祖怡軒
公庶幾天下之者哉昔馬援戒子稱杜季良遊俠好義而
龍伯高敦厚周慎勝之願子孫爲此不爲雲余於兩公亦
云

養拙質軒列傳

養拙公諱鉞字廷儀行金十二素菴公仲子也少讀書輒
了大義父母鍾愛之長而廢業事貿遷嘗渡錢塘於沙磧
拾遺物密伺其人而還之屢董部稅戒從者曰賦出於民
公家所給不可緩也然慎勿絃束病民性樂施貧人求者
無弗應時歲頻不登朝廷例行輸賑公同季弟鑑各輸粟
若干石並授將仕郎九品散官郡守戴公琥嘗慨山陰學
宮趾湫隘會有事鼎新公請於守願買地開拓守義之而
載其事於重修學記中今立石現存父癯疾則潛禱願以
身代比卒殮葬悉遵古禮公憂中得心疾母潘安人繼殞
又遷牀就殮毀劇竟不能起時爲成化甲辰享年五十三
配薛氏有賢行生二女早世薛先爲置貳室陳生子濤壽
復天無子後濤者怡軒之孫懋而公女嫁季翔者翔子曰
木伊府長史日本長沙知府本爲王文成高弟子稱理學

名臣淵源固有自乎嗚呼以公之行而終阨其嗣將無爲善者怠乎

質齊公諱鑑字廷昭行金十七公姿狀魁梧性開敏頗涉獵古今與人交不寢然諸此爲澳忍黷調之狀既用恩例捐粟行賑爲鄉里所推重益行義匪懈年四十謝家務卜築城西別圃有終焉之意越二年而攫疾卒年四十二時爲成化壬寅墓在亭山同邑御史金澤爲之志

家史氏曰正統間比歲不登朝廷特下明詔許民間輸粟拜爵於是素菴公父子相率倒困賑鄉里積粟至數百石公父子固好行其德不以賞勸也時同邑有周怡輸穀千石有司以其事聞特遣行人齎勅往諭旌爲義民勞以羊酒復其身家想見一代人心風俗後人建議以爲朝廷只費一黃紙而活所在溝中瘠無算救荒之策莫善於此然竟不復行於後世

兩贈公列傳

附守直公養齋公

贈公守愚諱澤字士悅行玉五怡軒公仲子也性孝友怡軒早卒公時甫弱冠哀毀屢絕旣而與兄守直同心禦侮保其成業及撫幼弟省軒迄於成立兄弟同爨者四十年世以爲難母趙安人愛省軒特甚一日謂公曰汝父棄世時汝弟尚幼汝借汝兄所置產渠何敢望第以祖遺田百畝畀之足矣公哽咽指天日自矢無他及老而析產兄弟三人一體至家政則聽守直獨筦雖一絲一粟終其身未嘗專出入蓋兢兢事兄如嚴父云族叔有無後者饒於貲衆推公當繼公輒辭及叔父養拙翁病革其子方襁褓也

而舉以屬公曰幸而長中分其產公拜命撫其孤且悉心經理其家事及其子長而復天無後房族胥利其有瓜分者十二三獨公一無所染指曰使余欲富則前者當後某叔矣竟以序推守直之子爲養拙後人多其善讓公嘗念昭父公世澤弗繼已舉子棟而岐嶷亟延名師教之程督備至每夜五鼓躬篝火至學所舉其書燈而去師弟子未之知也而棟乃學成遂舉正德辛未進士選讀中祕書授編修滿考賜封公官如其子已一舉鄉飲大賓年七十六卒後追贈至南京兵部右侍郎始公少時有州山里人吳某者方挈重貲入城輸稅縣官侵時出偶遺於俚褻處公繼至拾之遲其復也而還之吳德不漸引爲翁壻稱日久不衰公歲時伏臘上謁吳每刻期而在雖大雨雪必造門

吳益感之比公喪父營兆久未定吳察公中情懇惻遽割舍傍山遺公卽座山也至今相傳爲吉壤子孫承蔭科第不絕人又以爲還金之報云守直公諱濟性剛厲有爲每事向守愚公謀守愚公善謀而公善斷守愚公每置田宅計價值所胥告公公出囊中金錢不秤量多寡但手掬與之罄囊而已公年五十無子視守愚公之子卽子也故一生拮据無私財而字棟尤摯其後公竟舉三子旣拆爨復起其家比公歿棟方官河南藩伯特發喪成服已而私立伯考神主遺子孫世世祀以報公德

贈公守常諱灌字士誠行玉三十一父質軒公蚤卒時公方八歲二弟相繼穉齡爲嫡母傅所掬比長而思振父業或有告以王父素菴之德者公瞿然深惟當日居安思危

之訓蚤夜策勵居恒食不重味衣不重采自處身以外每事存樽節卽子女婚嫁賓親慶弔必量力而裁非其力不强圖也用能銖積寸累底於漸饒又慮事周慎謹始善終動鮮敗績旣老乃大治田宅稱素封公讀書通曉大義然不事鉛槧獨以一經教諸子竟起憲副公公嘗榜示子孫曰好名外慕學不固無力强爲家不成世以爲名言另著家訓一通千餘言大抵志其身經歷者一一如是後人刻而傳之卒年七十一後以憲副公貴贈刑部山東司主事錫階承德郎始公少而孤卵翼其兩弟並有成立其後兩弟子姓並起家文學浸浸盛矣竟忘厥自每事抵忤公公輒忍刻意務柔下之久之有攘臂逞公者公含忍如故終不與較人以是稱公克友憲副公櫟字元美號養齋少治

春秋有名越中治春秋博士家言者一時多出其門若陶氏文僖兄弟及其後人世以擢危科如券尤私其枕中祕故也而公竟以春秋首舉浙江嘉靖丁酉鄉試甲辰第進士除寶應知縣聞守憲公以旌旆歸闕補黟縣政尚清惠數與上官爭大獄民有青天一升之頌言鄉民以事至於吏事剖決如流邑人有青天一升之頌言鄉民以事至縣者僅裹糧一升不俟信宿也任滿去立祠祀公再祀四賢祠遷刑部主事出獻賢西尋擢山東按察副使備兵青州青故多豪猾馳騁動杆之綱號難治而公一切稟綱紀以振刷之所部肅然屆三年會以例輸公帑臺使者欲有所私也公獨不應由是見悟而公遂封贈其贖緩以行抵省以疾卒公爲人廉勃少俯仰然未達大體故所至引繩

守拙動失當途人意旨而論者或謂公以比部提牢會楊忠愍下詔獄公不及爲地以是爲忠愍所憾意公若有所逢者其然豈其然乎語云守道不如守官公殆坐是乎趙端

肅公錦嘗爲公立傳辨忠愍詔獄提牢事爲受誣始於論定云

家史氏曰劉氏推兄弟友于者莫守愚公若祖傳公已授翰苑封年六十矣一日偶論事失守直公意遽起披公頰公面發赤趨而去明日引所親數輩向守直公商過人皆歎服守常公獨不能得之於弟何耶至逆施不報公實無忝守愚抑又甚焉及觀公之所以處兄弟者動得一忍字則亦公藝所見少於後世者歟家訓千餘言去奢去泰範圍皆從百忍來而燕貽遠矣

南塘南園龍塗二峰列傳

南塘公諱深字士宏行玉十一素菴第三子拙菴公子也公母早卒事其後母王安人甚謹父歿所遺田宅王不無厚其所生而公安之無一語較久之有構公者積不爲王所容公乃去而屏居牛頭山力農以自艾山之塢有不毛地坐暴溪所嚙公度可以田躬率里人荷畚開荒積數歲成田五百餘畝築土塘以捍溪流歲可畝獲數鍾上之官起二稅縣官豪之自此里人貧者皆得計其荷畚之力以授佃而指爲世業里人德公呼其田爲南塘田其塢爲南塘塢至今而公亦用是稍稍起家所置田宅過諸弟王猶督過不已會復有構公者輒投牒訟公不孝太守沈廷鞠公公默無言太守曰汝何言公曰天下無不是的父母某固有罪亦復何言太守感動徐察其母子年相若知爲繼

母也不覺泣然曰殆爲是矣太守固嘗不得於繼母者也而輒絮絮以似公公叩頭請罪不已轉詰王王亦無言乃各諭以人倫孝義而遣之自此王底豫爲母子如初人稱其孝年七十五卒傳曾孫暹以縣令顯

南園公諱柱字元承行滿四司馬公仲弟也昆季皆以儒術顯而公獨代其父理家政自司馬以下凡私房錢穀出入皆聽公總其綱而公爲人警敏有幹才每事無大小輒辦嘗一葺水澄舊址再構新河新第皆豐儉中度公偕司馬公居新河新河之有劉氏自公始也性好客且好施予自二三親故外下至堪輿祿命挾一才一藝進者無不延款之壘壘客聞之益進會食嘗滿座雜以干請公不拒也嘗於大雪登臥龍山四顧闐闐有突無煙者輒曰此某某

家也亟餽之粟里有喪不舉者輒鬻棺以贈歲時棺不勝鬻至召匠者居肆以待其厚德如此始祖葬石橋塢者歲久而湮矣公從司馬公撥草萊披荆棘訪諸耆老而復之又捐貲治墓道甃以土石至今蒸嘗不替焉公始無子晚而得子稍長延師以教曲盡禮意卒起州刺君余先外祖南洲先生每爲余言館公時事方先生初泣館公一日肅容請曰孺子可教乎曰未也公雅知先生學行乃拱手曰某固無知惟師是命於是待先生禮日隆所治饗餐大小數十器庖人有進宿肉者公視先生意所欣厭亟徹之命別治以進先生酒後罵座或推食案至地數十器盡碎座中人失色公處之若爲弗聞也者徐命庖人治具如初行酒益盡歡乃罷有時督過州刺君已甚至長跪代請不顧

也一日酒酣夜半鼾睡矣公潛至牀下手攜其溺器滌之先生微覺而念曰主人情重如是自此課州刺君力三年而有成是時水澄羣從中有朱在川先生治春秋俞某先生治詩與先生治易皆以博士家言爲里中師三先生絳帳相望每會講會課過從無虛日主人彼此治具相迎勞如大賓而公嘗先之又力足以任卽二先生子弟而佳者公輒齋禮幣或楮筆之類旌之俛有所興起一時弦誦之風甲於郡城初先生嘗屈指門下士某某當舉者州刺君承間自叩則曰行及爾矣已復問故曰爾翁尊師之報當如是識者信之晚以恩例授醫學訓科與鄉賓年七十一卒

龍淦公諱根字元道行滿六十三生而羸爲父東榕公所憐愛故不習舉子業而時以其暇討究天文醫卜諸家言尤精於卜日鄉黨來謁者趾相錯不絕始公家頗裕歲時宗戚中有待公舉火者常數十家而門士食客亦無慮若干人故中年盡散其所積至一椽不存而其爲好施如故亦天性然也公仁心爲質自居家以及處鄉里所至以誠信與人積久而人亦信之越中市易多時鏹公曰吾所省幾何而壞此方寸耶終其身第用白鏹且衡尺概量一準於法故人樂與之市嘗於除夕往市海蜃其人誤以五爲十與公旣而其人覺曰不可負長者卽昏暮叩門補之其爲里人所信服類如此公嘗執里中徭役有同役者多坐乾沒以累公公所費不貲而終不責其報曰寧人負我無我負人且我已不較而遺後人較乎遂并焚其所藉負者

名若額而待其人懽然如故鄉人有鬻子者載一舟來子未鬻而舟已失其處其人夫號公聞之不忍卽買其子復償其舟時公已家無擔石儲矣公所至好行其德雖僕隸下人一入其門卽依依終身不忍背嘗遣一奴持三金市斗菽奴遺金於塗泣不敢見公公曰此誤爾弗問爾矣仍飫以酒而寬之聞者無不咋舌曰長者長者公家近官儲有一野狸日去夜來爲公捕鼠者幾二十年又有班犬自外而入爲之守家者亦二十餘年至老死不去人皆謂公信及豚魚云公昆季三人每事推財相讓東榕公之喪公竭力營墓封樹華表每從侈麗多過費而公獨身任其役曰吾致力二人猶勝施之神宮佛院以徼福者晚舉丈夫子三人次第延師課之伯仲皆有名諸生聞而竟不售其孫永基遂成進士公年六十八以萬厯戊寅卒又若干年而曠縣周海門先生爲之傳

二峰公諱勳字仲功行堂五初號東渠及厥考歿而葬南山面迎雙峰公每上邱嚙輒思愴因改號二峰公辭考堂南公世蚤而迨事妣秦安八年至八十有六公年亦望七晨夕奉養依依孺慕積歲十年如一日里中嘗欲舉公孝行佐以賓筵而公力止之曰此家庭常事曷足外揚人亦不之強公少而積學淹博史有聲費序入塲屋五舉而不偶因以例入太學晚謁得丹陽縣丞公性寬仁視民猶子畧不施鞭朴而遇事少幹局又不嫻於趨承卒忤上官意考以罷軟去職公自笑曰此稱情耳始公家固饒有內弟某者嘗賺公貲三百金公遂告乏竟以此積逋至

七百金至是宦橐蕭然公怡然安之而視其內弟終身如故處宗黨尤敦睦每事引以退讓常因貯一堂留貲爲從弟所持道辱公公急趨歸又庭辱之復毀公中門而去公深扃內室不出理一語人有勸公舉詞者公不應徐曰此妄人何足與較遇族子弟庭謁雖祁寒盛暑不盥櫛整衣不相接僮中禮至老不渝公自祖父以來世聞令德至公益醇謹外無狎友內無姬侍雖隱衷細行人咸信之稱公古君子始公旣積學不偶晚年一意課子及孫以有成孫毅舉於鄉公猶及見之捷報至公方坐內廳不起但曰未果已而親族喧填及門公亦坐自若徐起酬對終不改其常度其敦重如此後以毅貴累贈通議大夫廣西按察使

家史氏曰語曰有陰德必有陽報又曰不於其身於其子若孫劉氏自中葉以降科名蔚起大者著績旬宣次者揚休鎮節下亦綰郡邑之綬以循良表異頗云一時濟美及夫進而遡之祖父之身莫不有爲之券者若南塘公之事後母南園公之嚴師傅龍淦公寧人負而不償二峰公處橫逆而不較此其人精神度量動足包舉數世之遠視子孫富貴福澤真如及身而償也善乎龍淦公之言曰時鏹幾何而壞我方寸方寸之所留誠遠矣哉

司馬公列傳

公諱棟字元隆初號水澄旣貴以湖廣參政過所部遇颶風舟覆漁人起公於覆舟之下得不死因改號艮所公少治易年二十一以弘治戊午舉於鄉越正德辛未成進士

選庶吉士讀書中祕輒以古人文行自期授編修丁丑會試分考得倫彥式王惟賢馬仲房輩皆名士嘉靖改元甲申議大禮肅皇帝以興邸入繼大統議所以尊獻考上聖母徽號而觀政進士張燦首倡繼統之說以迎合上意舉朝不可公同諸詞林抗疏爭已大會朝士伏闕手撼奉天闕門繼以慟哭聲震內廷肅皇帝震怒盡收朝士詔獄摘首事以下戍杖有差公曰焉創甚死而復蘇尋復原官燧於公鄉舉同年友也繼統之說先以其疏草示公邀公主名而公正色詆之曰迂濶又曰子老而博一第不循分服官乃事躁進燧遂去而上疏卒行其說燧晉翰林學士驟貴矣初泣翰林諸同官者皆避席不見燧意獨憾公曰元隆已甚與修武宗實錄成賞銀幣九年考滿陞春坊中允

尋丁守愚公憂服闋會詞林多出外藩者用燧宿憾也公遂得湖廣參政分守武昌人謂公儒臣不閑吏事而公所至剔吏弊察民隱斷疑獄以練達稱提督獻陵告竣賞銀幣間以其暇觀風弔古所至登臨輒有題咏風動三楚間嘗遊赤壁命酌既醉乃駕危梯捫崖而上題詩絕壁聞者壯之卒以骯髒忤按君意被劾而燧在政府持之曰詞林外轉飲酒賦詩不足罪也蓋燧雖以議禮故異同而實心重公品行云久之轉河南右轄尋轉左某州守以忤兩臺故坐賊繫獄數年前後避嫌不決公得其情立出之在汴三年一意廉靖自持擢南太僕寺卿解任時司積有羨銀不賞例當歸公長子熙承間請於公公不答一日呼熙出政事堂令臨其所懸衣鏡曰汝鑒面孔何狀能享此多金

熙慚謝終不持一錢而去嘗以左轄入覲所贊朝貴止青布二端朝貴皆嘆服南太僕三年而轉太常提督四夷館擢南兵部右侍郎丁繼母憂久之復用薦起原官前後貳樞凡六年嘗一推南司空再推南宗伯推北少宗伯皆不報蓋權貴人迭用事有泥之者竟以引年得致仕歸明年以疾卒賜祭葬公性簡淡通籍四十年承其先世遺產未嘗有加殖僅築芙蓉書院一楹爲讀書之所清風介節表絕一時人以趙清獻擬之後先家居率闔門養重不輕以事接當道仲弟嘗坐私販事露爲有司所持公不爲動會巡方使者舒君過郡訪公公不見隨以一詩筆走謝曰獨坐幽居眼倍清黃庭一卷養心經西風吹動鶴鴿急那得安然坐草亭舒覽之曰劉司馬兄弟有故乎立命所司釋之其丰采不羣類如此公孝友出於天性晚居繼母喪猶哀痛如所生字諸弟怡怡垂老杖履相將時偕親朋宴集爲樂亦輒有題咏以紀歲月公所著詩文若干卷未梓災於火僅留若干卷後人梓而傳之公歿久學使者阮鶚素知公檄祀郡鄉賢又百年而從曾孫宗周爲之請謚於朝疏下部

家史氏曰大禮議起張文忠疏畧曰時議欲考孝宗而叔與獻者拘定陶濮王陳迹耳漢哀宋英立爲皇嗣育之宮中猶有父子之道今皇上以倫序當立循繼統之議非爲孝宗後也稱與獻以皇叔鬼神旣不安矣稱聖母以叔母得不爲皇上臣乎謂皇上以繼統而尊崇其親則可謂以繼嗣而自絕其親則不可今惟別立與獻王廟隆以帝號

聖母亦以子貴尊與帝匹庶全父子之倫而不失尊親之孝其言明白易曉而滿朝諸臣顧力爭之繼之以死而不恤無乃自囿於拘儒之見乎時杖者百八十人死者十七人戍而永錮者復若干人國家養士二百年自壬午諸臣而後所僅見者夫諸臣忠於先帝者也忠於先帝正以忠於世廟而全繼統之父子與全繼嗣之父子其心一也智不出此而挾私求逞卒導主上以大獄遂使忠義之氣阻而佞臣用事幾與世廟相終始易曰開國承家小人勿用又曰君子不以言舉人此之謂乎公訟獄中不寐詩曰孤燈獨照寸心明天地無情似有情魚鑰禁嚴遲月影虎關人寂但秋聲連牀聽雨溜方急永夜移衾夢不成俯仰乾坤真踟躕茫茫何以慰平生

三學博列傳

附贊初公

支峰公諱本字元固行滿十七司馬公季弟也公資性亞司馬公早爲諸生卽有聲學使者每試居高等又爲御史舒公識拔冠諸生全浙而竟阨於棘圍久之以歲貢授某縣訓導遷項城教諭罷歸始公爲諸生嘗開義學延里中子弟之貧者教之里人賴以成就者甚衆族子弟猶頌德不衰迄於今謂公平生慕義若渴其行事多長者惜乎未竟其志也卒年五十九

石泉公諱柝字元用行滿四十七怡軒之後茅山公仲弟也嘗以諸生教授鄉里而負知人鑒得高鶴於童子衆頗易之公曰無輕視高生爾曹不知也鶴家貧公每進於家而衣食之視其諸子如是者數年而鶴發解兩浙成進士

爲名宦卽吾鄉稱爲望梅先生者也又早識俞意亦成進士晚以歲貢拔廷試第三授南昌學訓導遷淳安教諭歸所至皆識拔寒士或捐俸贍之後竟以科名顯者公嘗戒諸子曰人不可一日不讀書讀書則朋友多而廉恥重自是不敢爲非年七十九卒

止山公諱至字汝善行慶六公自少家貧力學嘗晨炊不給輒聚廢紙發突烟族叔澄源見而憐之遺之薪然公性廉潔寧忍饑終不妄于人非義人多以士行歸之者旣而廩於庠漸資館穀以養積歲貢明經授宣平訓導歷教諭陞應天府授公雖久席廣文而義不妄取所得俸錢僅供飭粥及罷歸老而食貧如諸生時其爲人端凝溫厚居恒無疾言遽色或犯以非禮不較弟堦時不遜於公公視之

怡怡如也年七十四卒長子兆箕以武進士署指揮僉事總京營巡捕儒雅有父風不久坐廢且無後竟淪落江湖以死人多惜之而公之諸子孫亦相繼式微矣兆箕別號簣初

家史氏曰相傳國初謫臣公遇難遺誠族子孫無讀書應舉以故族子孫積百三十年無一人列序序者或曰時國法固然重典之後例不得應舉至弘治中始得司馬公方公初試童子時里中尚無敢以狀舉至強之乃應然自司馬公起而公之弟文峰公繼之其遺從兄弟則有石泉公再從兄弟則有養齋公三從兄弟則有三泉公其五服兄弟凡四十四人而以科名及文學子衿顯者十餘人其三子十餘人又多以子孫顯者自公五服外又有以兄弟顯及

子孫顯者真如沍寒之後，轉陽春而勾萌甲拆次第相見，勃乎其不可禦也。蓋寒臣公當日一片貫虹飛霜之靈，有必發於身後者如此而後，乃知祖宗一氣之相感不分支屬，無非毛裏則世之獨親其親，獨子其子者，視此亦可以憬然矣。

徽州長泰兩公列傳

附澄源公

徽州公諱集字元成，別號三泉，行滿三十六，樂善公之後也。自司馬公之後，劉氏多以易起家，而公繼之舉嘉靖甲午浙江鄉試，久之謁選為廣平府推官。公視事明察，日治竇慮，囚繩引刻，至無倖脫者。故於三輔有能聲，任滿擢徽州知州，未發遽卒於廣平。以櫬歸，年五十四。公性嚴毅，在官頗以清執聞。卽族子弟有不簡者，公每佐其宗老動懲之以法，或面加詬詈，人不能堪，弗顧也。其有所不平，又輒為伸枉白之官，所以故宗人咸畏服之。

長泰公諱暹，字無疆，別號虞初，行慶一百七十三。考曰澄源公，澄源公器達有大度，喜周人急，以信義聞里中。晚謝諸生習岐黃術，名擅一時。而金華同術者某生，依於公，偶註法為里中所逐，倉卒以厚鏹寄公，越十餘年無耗矣。公屢訪其人，至而還之。始公少而孤，依其伯考公，奉伯考終身，無忤色，嘗得公廩一斛，歲權子母而積之，越數十年置田若干畝，以供其祖南塘公伏臘，其數十年中，羣從子姓利于瓜分而爭者，數數至訟之於官，弗能奪也。後以長泰公貴，贈都昌縣知縣，錫階文林郎。長泰公生而穎異，年十七補郡庠，每試居高等，進餼廩七上浙闈，而擯援例入北

雍又再擯以萬厯乙卯舉順天鄉試明年丙辰試南宮詞林趙我白得公卷大奇以元薦而爲主司者所持曰信奇士也姑格之以正文體置乙榜第一是科擢會元者坐贖鼎事露告罷故海內咸惜公真元見擯而公亦用是名噪於海內又再上春官勉就教職得潛山潛士奉公如山斗用宿望也久之擢知都昌縣都昌瘠土時又以征調騷驛民疲於供繕公多方撫輯如催徵則力除火耗科罰則盡貯常平尤其惠政之大者居三年而民戴之丁沈安人憂服闋補選長泰甫拜命遽以疾卒於邸公在都昌未滿而及錫典會今上登極覃恩異數也卒年六十九

家史氏曰兩公居官廉所遺俸橐皆不能及中人產相傳徽州公歿官所諸子在侍爭攘取錢帛如禦人卽訟之官所公坐是竟敗其名而長泰公嘗與余舉陶彭澤之辭五斗以爲不可及也時公方謁選長泰余啓之曰叔爲彭澤則亦彭澤耳公笑曰行當與妻子謀之嗚呼廉吏可爲而不可爲厥有繇然矣

巽峰太虛列傳

巽峰公諱權字元中行滿七十八仁壽公孫也少與同里王積齋先生同學且相善王先生亟讓其博雅旣補諸生而省試輒弗售晚乃謝去然公性雅嗜讀書旣老猶手不釋卷日擁几案無寒暑或扃戶不出者累月雖家人鮮得窺其面公矜嚴好禮出於天性自少鮮戲言戲動長而愈自繩簡規圓矩方不踰尺寸公嘗自榜於門曰志存天下修不足學慕古人慚愈多其篤志好修如此公考先歿晚

事母陸安人晨昏定省曲致其懽比喪哀毀踰禮視妻子如嚴賓三子旣老猶出必告反必面不命之坐不坐不命之退不退間以行之羣從無不指率者家貧蔬食布袍義不苟取王先生守肇慶時迎公至署中有屠白等三吏以舞文坐謫王先生示意公居間而釋之然公憫三吏皆赤貧終不索報也滿然而歸姚江孫瑤岑比部亦與公莫逆交方令莆田時迎公署中有許大經者同父指騙坐院訪有方承郁者以假命受累公廉知二子皆名士向比部多方解之二子不知也後許舉孝廉爲阮江尹方第進士爲歙縣令皆操百金抵公家上壽公歿復走墓前灑泣而去年八十以萬厯乙巳卒王先生不輕許可人而特狀公曰公知金如楊伯起善交如晏平仲刑家如萬石君約已如

季文子居鄉如陳太邱有高節顯秩所不能幾其萬一者蓋亦知公之深服公之甚云長子煇學行有父風

太虛公諱炯字仲靈行堂九十七公資性不敏而自少能刻苦向學以自奮年二十九始補郡諸生又十年而廩於庠久之阨於例不及貢會光廟登極覃恩遙授公訓導卽以是年卒年八十公雖用諸生自老而學行雅爲士林祭酒前後學使者數舉公方正最後陞院左公尤破格禮之公爲人朴茂少文篤於行誼事二親及處昆季間率有至性方析箸時昆季互有言公但自訟而已徐解之曰兄弟何人而以貲財傷天性頃之昆季感動各自艾以克讓終公嘗輯宗譜承司馬公之後百年間世次名第如法表志而間以予奪寄之嚴而不苛簡而不晦至辨世系所自獨

不肯附會前人坐月祖之失嘗著有讀三譜考并上虞譜考尤稱卓識大宗祠漸圯公率先會計一瓦一木躬親拮据者數年乃還舊觀晚年益篤於追遠每朔望詣祠瞻謁拂拭几筵整序位次以爲常自此吾宗始知有尊祖敬宗之教公與人必以道義無泛交雲間何士抑嘗托雅遊後司理吾郡數年公薄其爲人自一見外絕不妄作緣士抑以此益重公公意自若與配沈白首相莊有舉案之風家人服其教子孫多以循謹稱至今不衰公自少無絲竹奕棋麴蘖之好惟一意好古讀書年六七十讀書聲呬唔徹四鄰或至夜分乃罷然竟不少倦其志氣亦命也豈所謂孝友爲政者歟宗周先世與公家比鄰先君子嘗以族子進交於公同研席最久莫逆如父子觀人於所友公重先君子先君子重公乎并附以志感

家史氏曰仲尼稱躬行君子未之有得爾公其勉勉者與雖文采不表見於世由其所立已卓然爲劉氏典型無疑

見吾列傳

見吾公諱燈字仲潛行堂二十八謚菴公之後也六歲喪父哀毀如成人家貧力學未弱冠卽爲里中童子師資以養母母病焚香祝天刲股以進而得瘥人以爲孝感學旣成試於有司屢躋公念苦守一經逢年不可期而母老無養奈何乃去而就他途以曹史起家公爲人倜儻機警初授蘆溝巡簡督造蘆溝大橋三年而告竣咨部紀錄陞任長沙永豐倉大使給由赴部考最擢遂溪主簿值倭寇攻陷電白等縣勢及內地遂溪其衝也時縣無正官并缺餘

佐獨公一人新蒞任晝夜拮据爲城守計而寇已壓境公親領官兵劉金佐愈子奇等數千人分駐雞籠山西寮村等處前後接戰生擒倭寇三名斬首十二級衆遂奔潰自此倭不敢犯遂溪已而各路官兵盡集遂溪相機征勦上官以公才命督理軍需及糧餉公皆取辦於咄嗟間事事無誤至所向克捷則公之勞勩居多時連歲興師饑饉薦臻居民死傷相枕籍海寇許俊美復乘機肆掠沿海公內撫饑民外禦黠賊種種方畧出人意表久之寇退遺黎亦漸有起色一邑安堵邑人立廟祀公當事者坐薦公新寧知縣而格於例不果行會公攝觀中途聞母喪匆匆了公事徒跣而歸忌公者轉有所中於制臺殷君正茂復用徵糧不及額坐公誑誤落職人多爲公不平者公旣服闋乃詣京奏辨得旨下部覆竟直公大畧謂公在遂溪以一縣佐攝正官當倭夷猖獗之日與民效死保全孤城已在敘功之列至於前項稅糧因兵凶交困征不及額見奉恩例罹災地方以四分爲足額昭皇上寬恤之仁則本官所坐似更有可原者遂復公原職再補安仁在安仁一意奉公不以苞苴自潤民戴之如遂溪滿六年而致政歸歸之日行李蕭然家徒四壁而已又若干年卒於邸時伯子贊亦從事京師方公病贊亦割股入益稱公以身教公儀度端偉被服儒行居官數十年所至侃侃樹立不以資格降志故郡中賢者如高給諫望梅沈廉訪會峰章少參稷峰諸公皆與公莫逆而館湖州最久潘閔凌諸大姓顯者皆敬公引爲忘分交族弟魚號躍淵亦以從事起家歷巡倉諸

曹數十年所至輒稱其官而物身端整不苟有素
家史氏曰國初用人不一途故士得寬然於經術吏事以
各適於用如况鍾黃于威爲太守傅衡洪秉龍士安爲御
史徐晞萬祺爲尚書皆以吏員而况晞又皆名臣後世遂
絕響矣我公始治經生業繼而讀律旣以文墨積貲冗僚
一旦有事輒披堅執銳自奮於請纓庶幾通人之雅量傑
士之兼能未可爲局促轅下者道也公同時吾鄉會稽典
史吳成器亦以禦倭功擢本府通判里人至今尸祝之其
事頗與公同而食報異

仰宇列傳

公諱炫字仲質行堂四十五晚更號太素居士以見志公
生十四年而孤事母金安人以孝聞年十七祖守常公卒
親戚以公獨子早孤議從俗祕不發喪而成婚公謂非禮
且哀毀迫切中寧忍爲此亦非情力持不可而止識者始
覘公之器識服除補博士弟子員未幾督學高等餼廩郡
庠四試浙闈不遇援例入南雍又改北又復困躓士論惜
之金安人病亟公衣不解帶者累月進藥必親嘗時焚香
籲天願以身代及卒哀毀幾於滅性晚謁選廣東藩司理
問以文學見知當道署龍門有惠政邑人至今歌思之量
移三輔參軍益用廉謹爲當道所知復署良鄉嘗夜巡遇
盜盜方自詭竟摘發服辜有鬻女于途者捐羨贖之仍令
地方所在以聞自此邑人少鬻女者其他前後政績多具
外孫商大司馬周祚所撰行實中會周祚初登第有皇華
之役因勸公解組公從之歸公歸又八年而終年八十公

爲人岸飭居恒不苟假人以嘖笑每出里中里人表邪者望見公輒引避而吉人端士時時進而與之

家史氏曰世教之衰也四禮咸廢民間有匿喪而婚者卽士大夫之家亦往往恬不爲怪俗之淪而夷何日之有我公以舞象之年獨排衆議伸至情毅然終三年喪於抱孫之愛可爲一詩空谷推斯志也以法我後人素冠之詠可無作已乎

成吾俳齋沖和雲岡列傳

成吾公諱燭字仲行行堂五十二檜菴公之後也公爲人輕財仗義時周人緩急而不責其報里中如二郁進士文言皆少與公交家貧無繼晷公以時周之不絕言晚出年且長廢學方爲兄文傭書以自給而公察其不凡尤解衣推食俛勸於學一朝先文脫穎去故兩君咸德公終身不忘言則曰生我者父母成我者仲行云族兄冽泉以漣糧不貲坐丞成縣官持之急無可控告者公慨然爲代償之遂得免比公歿冽泉撫棺慟哭曰無以報公其子孫至今談其事多飲泣者祖母痼疾公考南屏方昕夕侍養而一以家事委公時劉氏編爲十年里甲公獨總其成歲執一門徭役縣官督責諸大姓如東濕公敏於幹辦追呼無及門者至處宗黨以外每過自挹損每事輒讓人一地以是公家數十年無鬻訟之隙諱噪之聲公固曰恐驚吾祖母傷厥考心耳又訓其二弟焱文煥皆以文學顯而焱與馮侍御贈翁交好亦嘗以重貲脫其漣糧累於阨時旣而侍御追感焱德輒引其子弟爲通家好厚報之其世篤孝

義如此公年五十二而卒

悌齋公諱燦字仲昇行堂九十八公自幼事其考左峰以孝謹聞凡考若妣意有所屬公輒先事承之得其懽及侍疾湯藥必躬或遺穢牀褥必手自澣治以爲常處昆季依依一體有易衣同被之風又善調人骨肉間釋愆化謬俛式相好率本之衷情愷篤人故樂與公得公一言輒解公爲人溫恭律身甚謹居恒不輕出一言一笑卽庭除步止皆有常度尤恥言人過嘗曰面訐背毀不知自許爲何如人以是人益無間言歲爲人童子師里中子弟多出其門者已而郡中著姓爭延公所授受子弟他日多爲顯人而公每舉小學諸儀節以身率先之不徒嫻章句也先是左峰公家已中落至公又坐其配陳多病支離一枕者四十

年而力益耗田廬盡洗公處之寬然絕恥下傍人蓋終身固窮如一日也居恒每訓諸子曰處貧能潔處富能恬方做个人公其允蹈之者與卒年七十七

冲和公諱越字汝章行慶七十七公少家貧年弱冠卽事舌耕且教且學數舉童子不利三十補邑庠進而食廩二十餘年方需貢矣輒報罷年六十六卒始公年二十三而喪父遺其季弟僅五齡不數年又喪其仲弟所遺一姪僅三齡公前後撫之皆視其諸子已而并喪其仲弟婦十年中三喪相繼又遣嫁一妹又爲弟若子若姪漸進而就傅而議婚悉以身肩之無旁委而所奉寡母在堂年已七十餘矣于是公仰事俯育前跋後戾不勝其狼狽之狀至并日而食易衣而衣公不言瘁也公自弱冠舌耕以往歲歲

坐寒羶一片視館穀厚薄以濟諸艱不足則時向子母家
循環力愈困晚年會里中有徭役事人多規弗任公承乏
奔走數年以是漸荒其故業致罷諸生乃公固儒雅所領
各戶官稅復爲猾胥奸里朋欺因坐公乾沒若干公遂鬱
鬱以病終其後人多原公者競爲公代償之公家得無恙
而公所撫一弟諸姪竟咸與成立當其析箸時一椽一什
必鼎立而授公心猶惻然合子弟姪共僦一廬居之其至
性始終不渝如此

雲崗公諱彭行慶八十三始公家赤貧常習賈人業以賣
酒自活既壯始有室其婦翁王名醫也公從之稍習醫醫
粗通則裹一藥囊繫之肘遍走諸鄉村問病者遇所治輒
應遂稍稍有名而郡中始有望門而迎醫者其後術益進

所治無速効而守中以達俾無後虞謂之王道晚而益工
然公仁心爲術所治人病急叩急應緩叩緩應絕不乘人
緩急以射利里中知公廉亦無以厚糈要者卽徒手叩公
公不問也其後稍積貲至數百金生子娶婦以寧厥家壽
六十八而卒方公年未四十其王已謝世公遂不再娶
人稱真義夫余嘗戲問公曰貧義夫信乎公笑曰病義夫
耳里人多重公舉公鄉賓

家史氏曰劉氏之先世以孝義起家而後稍凌夷也隆萬
以來一二輕俊子弟巷遊而治處爭以月旦相高所至成
雌黃一經品題終身莫浣鄉里病之至家富則封植自專
罔知急難之恤家貧則遊手敗類不務四民之理往往而
是也此詎可令詒君子見乎得諸君子而風尚爲之少變

綿延於今數世之澤也

勿齋玉筭列傳

勿齋公諱燿字仲章行堂五十九拙菴之後左峰公長子也生而資絕穎丰神秀朗望之知爲寧馨甫能言屬對應聲出七歲鄰家火延及居舍時兩尊人偶出外獨公與祖母居公左右呼救不得輒向天哭拜曰願留一椽蔽我祖母頃之有絳袍星官執笏而降於庭者火遂熄留三楹焉衆見奇之九歲通舉子業十四能詩嘗從左峰與陳海樵先生遊譚間及三月清明二月天家家戶戶打鞦韆之句而失其後聯命公他續之公應聲曰憑風吹落桃花片冲破樓頭一抹煙海樵擊節曰真撞破煙樓矣十七補邑庠十八讀廿一史及諸經其讀書不再過惟於姓氏地里年月處轉以指爪識之亦終身不忘爲詩文惟興所到燃鬚擊節動出嘔心旣脫稿則持向人讀一過輒棄去或勸存稿曰是足以盡我乎公少負大志留心經濟之學歲壬子倭虜交訌公講求兵事如龍蛇魚鳥之陣水車火器之方皆得其要領至於諸邊墜壁壘指畫險易如指掌遠及大荒絕漠窮髮反脣之鄉亦如身履其地者又嘗考西北水利時與邑令徐孺東上下其議論卓有成畫其後孺東入諫垣持疏請於朝行之今范陽漁陽雲中北平畿內外遍爲沃壤實公啟之也公於書無所不讀一時號爲博雅如石鼓銅梁之類皆有考證又多智鑿張江陵用事勢赫烜而以其家甘露聞內外雷聲貢諛時公方在楚楚藩參同鄉陶公偶問公公曰是何國人之誤也是爲雀錫厥徵

咎張氏其當之已而果驗鄉前輩徐文長少許可人獨於公則曰仲章詩今之李賀也若學之灑博則吾不如苕溪茅康伯最好古書一日畫舫入錢塘遇公於邂逅公一一爲之鑿賞因曰一夜話勝讀十年書惟仲章足當之公爲人坦衷朗度無城府與人交一見如舊好故所至海內賢豪長者爭倒屣迎之而在里中朱文懿張文恭二公尤莫逆二公每相謂扼腕曰吾輩顯榮仲章淪落其如造物何公嘗九試棘圍而不售竟以老謝諸生家貧再遊京師京師諸名公倒屣如故日代人筆墨以自給公因自詫曰吾其終隱於文乎居七年而卒於京年六十一其後鄉人私謚公曰文隱先生用公志也公嘗著論曰世儒痼於禪動詆訛宋儒以自爲名高澆漓後學日甚此風不已異日王夷甫石勒之禍誰執其咎宋儒之有大功於世者正在廓清晉魏虛無之談而歸之實地言心言性動依名教使孔孟之道煥然復明於世迄我國初仗節死義之臣雲湧川渚從古未有如此之盛者而吾浙往往爲之冠則以朱文公呂成公尹和靖先生三大儒或產於浙或寓於浙其流風餘韻猶有存焉故也卽前此開運佐命如四先生皆浙產又非其明效較著者耶世心爲篤論公著述甚富多軼於燕邸今所存者僅應酬詩文若干卷後仲子台封以長史貴贈公如其官階奉政大夫伯子華封號中白蚤服公訓博學好古議論侃侃動遵名教人呼爲大儒畏之者用以爲訾顧得實錄云

玉笥公諱焌字仲電行堂一百三勿齋公從弟也公考卽

龍淦公以隱德著鄉里公承之遂奮於學其淹博與勿齋
齊名而趨向卓犖過之早爲諸生至七試場屋不售而三
子相繼起皆讀父書以有聞公遂罷諸生自老輒放情山
水若葦亭飛來峰雲門若耶之間時有遊屐遊櫓已又上
天台度石梁南抵白門北過淮揚西臨滕下益充然有以
自得一日上吳山聽鶴鳴日括十二偈泠泠動遺世之想
而聞者以爲悟道晉中曹真字共生刻而傳之始公家微
貧閱歷困頓深自堅忍日手一編上下千古已抱通人之
識矣既從諸子馳驟海內諸名公間日聞所未聞而公遂
鑄其三子而鳴伯得其肆仲得其毅季得其恪公嘗挾一
冊自署其首日年過知非乞言自勵蓋公志學之始也公
既勇於從善苟人有片語相及輒痛自刻責至終夜不貼
席曰何因有是學人未入真空地未必杖擊皆空其不苟
自恕如此又嘗訓塙等曰涉世須忍不忍禍從外來衛生
須節不節病從內出又曰學務闇不闇不章學務有用無
用則爲僞嘗手植花木自娛而率取其秋實者曰吾賞其
用懼朝華之易落也公自少有至性始龍淦公大困於徭
役罪且戍坐繫縣官公時以儒生請代不得則發憤讀書
曰吾得一遇而脫父於阨吾死無恨已而爲邑令徐孺東
首拔破例免龍淦人以為孝感友愛二弟既訓其仲爲諸
生而季方稚齡卵翼尤至又捐地以葬寡姊推之母黨祖
母黨咸篤不匱之思晚年嘗欲置義田建義學以供族人
事雖未舉識者咸偉其志氣又嘗手著家譜一幅三百年
間世派分合如指諸掌復規而爲圓象太極生生之妙尤

得之創識爲人所珍卒之前數日猶手著宗約以貽族人年六十六公所著有玉笥山房稿二卷鄉人私謚曰介達先生後以仲子永基貴贈兵部主事階承德郎進祀鄉賢家史氏曰兩公並以腹笥行祕擅名諸生間發爲文章或出入風雅或沈酣典籍居然不媿儒林翹楚而兩公學術異軌勿齋公崇尚紫陽謂其有大功於世至以王夷甫石勒之禍防後世之逃禪者真篤論也蓋是時有學文成而訛者故云玉笥公服膺文成歸之有用其於入孝出弟之間抑何斤斤乎聖遠言湮道術分裂朱王之爲奴主曹起而爭也舉世然矣合兩公而觀去兩短取兩長庶幾同歸一致者乎

州刺史兩公列傳

州刺史凝和公諱字仲瞻行堂六十初號壽樓方公之生也有梅枝插於瓶而結實如彈丸者人以爲瑞其後偶與先輩張太僕及之謂公曰君得天地委和之氣故生有佳兆然凝承保台其在人乎因改從今號以自勗公美丰資格韻瀟灑喜清談佐以詼諧亦善飲每親朋雅集公持觥疊疊笑語傾四座客時啟公作新語公卽景和會動鑄齊諧雜俎間聞者爲之絕倒酒酣卽席坐冥真不減玉山之頽須臾拭日神情朗然雖大醉舉止愈閑雅終不以跼跼敗度居世不甚閑苛禮而率真遠俗動鑄天機外浪圭角亦不內設有城府視人世一切恩怨可否之形公處之皆過而不留早工書法大書傲出谷真草畧規右軍而化以矯逸如蒼龍古幹亦工詩時時得之率易寄情古淡有

陶韋之風公每從親朋索書輒手不停揮遇登臨遣興把酒淋漓而公絕稱長尺餘杖履相將望之者以爲神仙中人公嘗曰我輩置之東晉間遇王謝諸人未知孰爲伯仲公少疎宦情謁州縣非其好也所至在官雖吏事紛拏時時不廢合毫即左右胥吏中不持筆者輒走筆書之得之者以爲珍而人議其疏公亦不顧又時與僚友學博輩流覽山川賦詩爲樂吏人或抱牘至輒揮手謝去而已始南園公年五十餘而舉公既長督之學補邑諸生屢試浙闈隆慶丁卯以例入太學是秋中式順天庚辰謁選令連江治連江不事捶楚而民服嘗頌公爲劉寬然邑有吳姓者恃其兄貴驕橫殺人公立杖斃之滿六年擢守沅州在沅一如連江時又三年報罷公前後在官終以不屑簿書致左右多叢奸利離沅時吏侵糧事露爲上官所持會子佳奏捷乃得解晚年家居有侍兒竊其貲私一傭者一日傭方治圃見公至忽蹶而懷中逸其所匿金錢無算公不之督而遣之其他若竊公貲者苟未以終不暴其短人益服公德度歲庚戌公年七十八方與客坐廳事語次問一欠伸而化人謂公真得全於天和者或曰疑解云公所著有筆譚二卷詩博笑篇二卷皆刻梓閩中晚年所著多不存稿

州刺史崑崙公諱佳字汝醇行慶六十四公自少莊嚴不與羣兒戲既長益不喜通賓客方公五歲時蚤起見牕牖露白卽號啼以遲悞自艾家人因以青布幘其牕牖非遊邑官也令劉景孟試拔第一萬厯壬午舉浙江鄉試七上

春官不售乃就教職得潁州學正在學嚴師範諸生少湯
簡者稍爲當道所知膺薦擢國子助教丁母憂服闋補原
官出守郴州居二年復丁父憂會大計報罷公在郴有鄉
紳袁職方貴倨時縱其奴子橫鄉里一日見告公輒繩以
法袁憾甚遂下石焉公在官一意抑豪右扶善良奉公執
法不可撓以私類如此者而性褊少容又峭直不能俯仰
人故所至動與人忤方公守郴時劉景孟猶在浙藩嘗謂
人曰不意劉君而一行作吏蓋亦知公之深云公歸則杜
門掃軌築一小齋如舫名舫齋日坐臥其中臨池賦詩有
以自樂間遊戲於墨竹然頗矜貴不輕以應人公詩風格
法少陵晚而益工時過其乃翁而書法少不逮公旣杜門
久益嫉仇流俗富貴之士過之者輒望望避欲交一語不
得或持幅乞公書畫公欣然倒屣笑語移時不倦也公嘗
大署其門曰若問買田須過岸欲求書字卽開門客聞之
益罷去卽子姓鮮納屨者而識者以爲有士大夫風氣公
嘗著有放蛙文鄉前輩周寧字先生見之遂不食蛙其爲
賢者所敬又如此卒年七十二

高淳衛幕兩公列傳

高淳公諱煬字仲陽號明石憲副公長子也公少從父授
春秋晚以明經貢入太學謁選知高淳縣公下車值瀕年

旱澇非常江南大饑神廟特遣科臣楊文舉發兩淮漕稅金錢數萬行賑假舉劾權而楊婪甚所至張會置酒郡邑吏望風捆載趨承之恐後公獨無所阿旨一意字饑黎所頒賜金輒以法設賑俾民沾實惠會楊徵名優於淳公以一老優應命曰歲饑優詘矣楊恣不憚第公考中下先是令以救荒藉口料富民錢穀而授耳目於奸猾因以爲利諸富戶恐相戒閉糶貧民持之急卽商賈不敢出其境而粟益詘價益湧民用大困至是一切持以寬簡令民得自相質遷與時低昂四方商賈來歸粟麇集其年復大旱自五月不雨至於八月公又請賑於府府爲出常平之宿儲聽公便宜而少京兆德清許敬菴先生親行縣因饑民之力而授以食俾修築患堤公夙夜乃公調度有法久之

成所活飢者以萬計而向之甌脫不毛者皆爲澳區矣公視民泐泐朴誠遇事若無所揮霍而所至推心人咸用命處饑疲之後每事還以安靜又視躬潔凜吏束手無所恃竇久之訟獄漸稀民鮮以事至縣者三年淳乃大和乃公旣一意爲民無所阿譽於上官卽一切過客廚傳以歲飢僅具脫粟益用數數開短遂以大計落職淳民方戴公爭詣臺使挽公公止之曰吾用明經自格耳非有他也公去而淳民思公德不置爲之傳循吏續載邑乘中旣歿若干年淳縉紳先生黃秉石又爲之立傳始秉石方少年膺公國士知其他賴公獎拔而儁者比比故淳士多德公者公爲人惻幅無藻飾居恒訥訥口不能出言至遇事介然有守義所不可賁育不能奪卒年七十九

衛幕公諱遂時字汝振號行可行慶八十一明石公猶子也公考太學君曰明渠孝友仁慈人號佛公子公承家學治舉子業益肆力墳典稱博綜以例入成均累試弗售乃稍去而治長桑君術遂以其術名於時然非其好也公少有高趣每讀書時時以古人志節自勵視世之奄阿渙忍一切爲聲利謀者岸然弗屑也旣困諸生日久意頗牢騷輒形之詩歌或時與一二知己彈棋賭勝流連於花晨月夕之間爲終隱謀矣一日親友勸駕謁選慶陽衛經歷卽榜其門曰五斗不辭甘仕隱一冠未挂聽浮沈已而受知於藩伯李公維楨李當世文章宗匠公時以古文辭寄之吏牘用破格禮之遂委環縣篆環民瘠地衝軒輜相望供億不暇公輒裁損以舒其困有辟而枉者私輦數十緡以

請公卻之而仍白其杜暗是孫生肆赦監司慮下牒徵銀公弗應曰已從赦條除之矣慮心慙公甚旣而同諸下吏庭謁公獨以教官禮見弗叩額慮曰搦之公退而奏記其畧曰語曰禮義廉恥爲四維夫禮有時拜跪以將之不以爲諂然而搏頽伏堦不及於士我國家之命官也儒術與才幹異不獨養恥亦開禮焉故胥而幕者卽虵伏故燕耳尤而效之於上不加隆而躬博士之軌者不幾頓乎慮索過益急竟奪其署篆環民有泣送於途者公遂投暉乞致仕在環不持一錢并俸薪與~~諸~~執皆揣上意格不給蕭然而去官往來行~~令~~告債於家~~所~~數萬銖而家自此耗矣或勞公曰~~病~~乃公公笑曰~~貴~~爲公苦也因自號樂休山人~~仍~~著其~~書~~曰山人著~~書~~也劉子也性秉

直不慕權貴不交詭人惟詩書是樂喜與朋友以忤當
道歸家四壁立怡如也別號樂休者世人以營利爲真銓
以華寵爲要轍行盡如馳而不知休知休矣或不能樂凌
援者休於踰酣忘者休於蕩忽忘者休於困則病蕩則
亡驕則敗其身之不保奚能樂也人難與談敵廬足以
蔽風雨薄田足以供飢粥詩可吟書可玩山高水清鳥啼
花笑或含箒以美孫或敲棋以對客或咀餌以療疴或煮
茗以滌慮倦一枕醒一樽行無牽止無尼不知老之將至
則謂之樂休亦宜歲癸丑年六十里人爭繪樂休圖以贈
公益履而樂之明年以疾卒公兄弟四人其二幼繼母韓
出也旣析產而公考太學君猶規田自膳公曰焉有人子
而不養親者遂朝夕具饌修以及韓安人及太學君歿公
事韓禮益謹母徐安人故遺有醮田公復捐之以奉韓而
并爲綱紀二弟之婚娶俾有成立世以爲難人有逋公者
欲以孕婢抵公曰婢抵已甚婢而孕不爲若敖氏計乎蓋
其人尙無子也立焚其券或佃者累歲告逋公亦優假之
不問一日盜犯公隨覺而逐之并遺其所駕舟且視舟知
主者公亦不問其行事多長者類如此也公所著有醫方
考義山人雜說可也堂詩稿若干卷藏於家
家史氏曰余嘗從許恭簡公遊道及高淳公築堤事頗稱
公之賢而惜其去云晚近世爵人尙資格卽乙榜不能望
甲科何問明經下及胄監非其資卽其人龔黃卓魯其治
行不足稱也然而所居人戴所去人思者非乎樹立如兩
公亦異乎科第而委瑣齷齪以致通顯者矣夫兩公固憲

副公子孫也高者爲郎下不過冗吏乃能所至不避權貴人動以雞肋自謝殆繩武而益光者乎而衛幕之風更遠矣漢人云公慚卿卿慚長

沖倩列傳

沖倩公諱塙號靜主而以字行行慶一百八十四公賦性高朗少負不羈下筆成文千言立就家徒四壁也旣壯輒慨然有四方之志因出遊所至尋師問友間資館穀以續膏不屑屑也邂逅遇窘者卽洗囊與之而公復意氣激發與人無新故輒相與傾倒故人爭歸附之旣而之白下遇周海門先生於樞部談良知之學遂執贄以爲人生舍此一事無別有事卽舉業亦此事中徐事時許敬菴先生楊復所先生並官南部與周先生鼎立而論學至無善無惡之說周許不無異同因有九諦九解公曰異同非學也願與三先生剖而同之遂并刻諦解合之天泉證道記而時進許楊二先生之門問學二先生亟印可之於是遊三先生之間者互相往來時聯學會新建宗風於此不振則公實左右之矣自此沖倩之名滿天下遇學士大夫無不把臂交權而公之識解亦日進立談間往往開人積痼奪人所懷來雖自謂老師宿儒未嘗不心折公不覺其席之日以前也於是往來南北又師事鄒南阜李儲山曹眞字焦芻侯趙儕鶴孟連洙丁敬與諸先生而在越師事周先生頗久周先生嘗曰吾得沖倩而學益助發手書天下士三字贈之其後周先生主盟越中會山陰令徐君公舊交也時時往還如布衣時頗坐嫌至見謫於舉主陶文簡公聲

色並厲而令君交自若曰吾固有以信冲倩也淮撫李公嘗交公每拂席而進曰請登徐孺子之榻浙學使者吳公方在任亦用舊交招公公不赴既而書抵公曰督學與國子生無與而引嫌如是吾座中何可一日無冲倩其相信於師友間如此公既慕善若渴所至以學接引人人賴以起興者頗衆而俗流士亦用是嫉之若仇又才高意廣動傷任俠以是益不滿於鄉曲晚遊京師出入趙曹諸先生之門人多忌之者遂中蜚語歸歸而鬱鬱以病卒公無子畜一妾而嬖卒以敗行去公用是益懼族議然而識者固信公爲天下士也遂以題其墓云公由諸生入太學七試場岸不售臨終著芙蓉詩二十七首一切知交倫序俱如話別另詩文八十餘卷多散佚其存者亦未及梓姑俟論

定云

家史氏曰劉冲倩之名滿天下愛之者欲加諸膝而憎者爭欲殺之而後快公曷不浮沉其間以免乎舉世尚鄉愿而公特破樊而出余嘗謂公蛟龍也伏不久潛不深出而據見田之位夷山填谷必有受其禍者則世之欲殺公也固宜而公固曰吾寧不爲鯁耳始余髮未燥望見公輒避去既而稍稍就之謂余曰子少年而貴終身無朋友矣余退而思之稍知向慕公終以才氣不相及處之落落至今每念公輒爲愴然因特爲表而出之曰劉氏三百餘年而談理學自公始雖行不掩言亦狂者之槩也

藩臬兩公列傳

僉憲公諱永基字特倩別號止菴行慶一百生有靈骨自

少讀書卽不屑尋行數墨而性沉摯好爲攻苦之思析理
繭絲牛毛不挾其隱不休從父勿齋先生識之曰此吾家
千里駒也弱冠補諸生卽有聲詞壇已出贅京師六年歸
復遊學四方所至無不拭目期以大器者會朱景峰公延
公丹陽署中偶得陽明先生語錄讀之遂知人生有性命
一著蚤作夜思有得卽書之然苦無指點及冬解歸適兄
冲倩亦歸自金陵聞周海門先生之說若各挾髻珠互相
矜詡而冲倩遂以公介紹於海門先生而喜可知也萬厯
庚子領鄉薦先是學使者錄科至三試竟格公孫山矣臨
場采風望與友人章智父同收而是年章智父亦捷一時
以爲異六上春官丙辰成進士謁選知宜興縣宜興劇邑
自來吏治葺闕積爲奸弊蔽公甫下車而發吏書以假印
乾沒之稅糧至七千餘兩又擒積惡有名之天罡以下數
仍分別議處縱其末以者他徙自新三年而復籍於是洞
庭大盜潘十三等亦以風而遁曰吾不可以累神君已而
竟執之丹陽境內蝗公親往窮鄉設法遍捕一夕蝗多抱
蘆死者其他若惇厲學政勸課農桑清理訟獄均平徭役
諸事無不種種規畫凡四閱月而政舉遠了王安人憂以
去士民皇皇挽留至以奏京師欲公奪情視事不果則策
望來亭留衣亭以志思而思公者反用是騰謗以爲公固
有以致之也遂以以論調服闋補贛縣居一年宜士民
仍欲得公復調補宜以而贛民爭挽公相持者久之竟以
公與贛鎮坐督撫爲以省都會兵民雜處公每事酌爲補
瀉而調停撫禦之術盡一日營兵以缺餉譁逐其主將

擁二千人持械詣府劫所繫罪卒適兩道皆乏府印官又以病在告公挺身出見譁兵曰爾等何爲而自遠死已私念非卽用倡亂人定亂不可因呼其二隊長誘以反罪爲功長心動擁公還營中張旗喊砲爭露刃以待公卽請以下操法從事一營遂無譁者因從容諭說禍福衆稍稍解而二隊乃率衆隨公入謝督撫縛其首事者七人正法自此公遂代領營務分其強弱爲陣守二日以時訓練焉無何邑大饑公設六廩以貯賑既貴糴以來遠又賤糶以平價而米驟集又刻救荒四帖以風遠近之慕義者人心乃安公治邑如治家雖纖悉必精心密慮爲千百年計甫報成而擢兵部車駕司主事當是時公名赫甚天子東事方急旣失廣寧惟山海一關曩夏是限需才無得當者乃連擢公山石道兵備僉事會婦寺交亂朝中諸名賢相繼去國而公所與共事者若袁崇煥劉詔輩皆逆當私人公日夕憤睡且謂兩人異日必壞邊事語稍稍聞逆黨竟以巡關使者論劾奉嚴旨削籍公當關凡七閱月而逆戰退守咸有成局首懲遼事之敝在兵多而餉冗以一隅困天下乃於關內清七營稽二局定四運歲省金錢十八萬報部當事者心懸之而事益不便於同列用遭黜去公另著有恤後十六議曰在局曰圖東曰撫西曰兵曰馬曰總查兵馬曰器曰將曰餉曰屯利曰鹽利曰鑄曰日撫利曰稅利曰總論遼事曰總論遼利其論布局畧已公出關門而前屯前屯而寧遠寧遠而松山以及錦凌右明市四層之局矣規遠者重在前是也然非節節後勁可存此進法

否守近者重在後是也然非疊疊重藩亦有此法否此
不論戰與守皆合如是則戰守原非兩局入以意分之耳
今現在官兵十一萬七千零馬四萬七千疋以兵二萬馬
一萬夾關內外而守之一鎮一道一廳儘足矣南北二部
可廢也改北部爲北協轄沿山一帶以至關外一片石止
又改南部爲南協轄沿海一帶以至關外中前所止南北
各三十里實相峙爲關城外戶焉若遇賊不能堵絕則放
之來關以一片石中前所互兜其後爲背擊再以船營一
營放出芝麻灣與六里舖爲腰擊如此而敵潰而過西則
關矣潰北則山矣潰南則海矣不爲三絕地乎此爲攢打
而砲砲及身敵能久耶但前屯之中前旣轄於關則促而
別之轄及中右兵一萬七千馬八千儘足矣本鎮兼馬步
五千船兵一千所兼馬步兵各三千所沿邊堡十餘約四
千驛站及衛所千餘然以堡分隸於營營則直隸於鎮斷
不必再設協也道則關道可兼之加一廳可也寧遠之中
右旣轄於前屯亦促而前之可轄及杏山松山兵二萬馬
一萬儘足矣本鎮馬步五千覺華島船兵二千中左杏松
兼馬步各三千所隸臺堡十餘約六千以有撫夷口應多
設防也驛站及衛所千餘亦以堡分隸於營營統於鎮更
不必再設協也一道一廳可也至松山而爲內地一大門
牆矣自此正東而往大小凌河者則爲中衝防焉然自十
三站閭陽驛北鎮堡以至廣寧高平沙嶺而達於三岔河
三百餘里勢尚遙自此稍北而往錦州者則爲北衝防焉
其自義州以達廣寧防西則追去東益遙若敵出瀋陽出

黃泥窪渡西由廣寧邊路從義達錦相去亦遙也自此稍南而住右屯者則爲南衝防焉其自杜家屯東至三岔河亦百七十里比凌河不甚異但南出海口止二三十里其自二夾溝渡娘娘宮徑襲蓋耀而固守之是爲扼吭而守金復在其後矣然冰泮而渡則爲絕地胡以濟應冰堅而渡則爲共地我憂奔突熊經畧嘗營精於此非無意也但忌功而不與島帥會局此計之左也然則三衝防斷不宜撤亦不必撤其防錦州也就地制用卽有守關種種法焉進可圖義亦可圖廣雖云東遠而防西最要且此二城亦非可久空之物也議有移撫於義州之太康堡者不爲無見但須次第行之耳其防凌河也此爲正衝與右屯錦州各止隔二十里實相犄角而十三站閭陽以及壯鎮就地制用亦豈無守關法種種焉不但過東且以圖廣烏可少也其防右屯也我渡之於冰泮實不易彼渡之於冰堅實甚易但就葦莽而設伏就坑塹而設險就曠漫而設疑就冰凌而設陷如何腰擊如何夾擊如何兜擊其就地運機而制之法者烏可窮耶故謂於此三處決須設三副總爲三協焉然要仍隸於三鎮之下以凌河協直隸於寧鎮以右屯協隸於前鎮以錦州協隸於關鎮道則總轄於寧道加一廳亦可矣其凌河協則與馬步兵一萬二千由十三站閭陽驛北鎮堡以至廣寧處處布設且練且屯且防焉右屯協則與船兵五千又馬步兵七千東自杜家屯至西寧南則沿海處處布設亦且練且屯且防焉錦州協亦與馬步兵一萬二千由義達寧各邊堡處處布設且練且

屯且防焉統計三衝防止用兵三萬六千合之寧鎮之二萬前鎮之一萬七千關鎮之二萬止用兵九萬三千於十萬之數尚有餘也如此畫地而分布之卽如此畫地而貴成之以有定之鎮與協責之戰守有疎虞其罪有恢拓其功也以有定之道與廳責之理覈有虛濫其罪有查飭其功也奮勵之氣各振欺蔽之習安容以此爲守是有重重藩籬之守也方爲實守以此圖進是有節節後勁之進也方爲實進遼功其終有底績乎其他著論皆井井碩畫實可見之於行公方欲次第展布以結殘遼之局而時不能用識者恨之公歸五年今上卽位誅逆璫及詔明年戊辰起公陝西洮岷道廷臣交薦公議調公薊遼間以備東及西時西人之附薊鎮者已陰款東而攜我挾賞叩關無虛日卽公所謂撫西者也無何公泣洮岷卽病病一月卒於署矣海內識與不識無不謂國家失一長城越乙巳逆煥遂引東騎入都城九廟震驚識者益思公先見公卓識沉幾遇事不輕發而動有勝算自謂得之學問之力始公旣讀陽明書有得益深自體究識解日遠又困於公車日久於人情世故靡不諳練每事行有不得則深自動忍時時從極難轉身處轉出亨途故一日服官隨試輒效亦時時以學爲官以講學爲實政事方公在宜有明道書院在簞有濂溪陽明二先生祠公所至輒禮延鄉先生及諸子衿講學其中人多景從之在越左右海門先生時會陽明祠儕輩多興起者公旣沒進祀鄉賢而贛祀公名宦所著文集若干卷其爲語錄之類曰心牖曰雙柯曰知歸曰允蹈

曰決定如是曰自詰等編亦足想見其一生孜孜之心云方伯公諱毅字健甫別號乾陽考敬齋公以公貴累贈通議大夫廣西按察使祀鄉賢而公其叔子也公負異才自少讀書則嗜古文辭所制舉子業率用古文辭誓牙自喜故數試童子不利年二十六始進膠庠越明年萬厯乙酉中浙江鄉試己丑再上春官爲蕭漢冲公識拔列第六人廷對賜名二甲庚寅除刑部貴州司主事尋奉父喪歸服闋補原官甲午典試東越尋調兵部武選司歷員外郎陞山東提學僉事公既淹古服奇負人文冰鑑所較郡邑士甲乙如銖錘不爽而風裁峻飭一意貞憲體無旁愆鄉紳有同籍而典黃門者置其二弟皆劣等或爲之地請少假弗得諸權要人望風謝去當是時格私請者不無缺法而

臨胸大宗伯馮公嘆揚特甚所拔士後先策大科或爲鉅公或爲彥士指不勝屈至今齊魯間談公猶凜然以爲後無繼者辛丑轉福建右參議監視建南道有吳建者煽白蓮教聚衆數千人肆出剽掠屢脾諭無悛心乘撫按並缺建遂叛公陰行招攜脅從者得誑誤自新建因內訌而就縛事平民惴魄兵燹輒奔賊鳥獸散公多方綏緝乃定時攝撫者爲方伯徐學聚攘公功推閩撫公頗不平微語刺徐徐用是憾公會給事中夏子陽以冊使琉球入閩而久駐建寧頗榜鎖丞簿尉史公每寬請又稍汰其供億及入省造船索大桅木於建公謂環閩皆木也而遙取於建發屋躡畝耗道里費固謝之給諫積不平迨冊返洩憾於徐而大計之糾疏及矣時公已擢憲副且告侍養歸隨丁太

淑人艱服闋已酉補廣東少參巡視海道公申海禁卽津
要域奸無片颿指濤際已晉糧署副使署篆兼鹽法數道
則有黎議鹽議稅議之裨粵者最弘蓋遵海而南黎賊之
蠢動也羅活狡陰陽而多港作我耳目適喉抱繇諸峒相
讎殺時論多縮朒養癰公三請勦卒懾勦歸命又爲黎情
十議撫其畧其一曰抱羅諸夷前雖犁其巢窟而所據自
如故旋撲旋熾今二窟平矣其奴岐者能終甘人奴否插
諸峒者能耦俱無情不同穴鬪鼠否猛獸伏檻每思走曠
編籍者能不苦繩約頌掣繚勒否則調伏者宜講也其二
曰黎雖異類性猶近樸奸商利其貨而誑之士舍操官兵
而恫喝之文武墨吏無藝之征凡十四種以驛騷之今議
市於界地不得入峒文武墨吏並不許遣一卒索十四種

土物各匠入峒者給以牌逃民導亂者繩以法至撫黎廳
一官名爲撫而實叢賄府怨尤當首議革者其三曰諸黎
中羅活最强地亦最險設守備留客兵又募屯田而兵之
是矣但田畝必丈明斯兵額可定農具自官給斯衆志樂
從又羅活兩山壁立可以控奇未可以張武似不若抱繇
之尤便耳其四曰德震立縣之議舊矣但立縣則必事經
營而空帑安給立縣則必具官兵而風嵐未安不若先令
巡司移劄昌化所移守又設堡相望守望相維募兵屯田
一如前法俟風土習而物力完或立縣未晚也其五曰黎
夷夙馮灌叢伐枝猿猱而旣芟其林菁業失所馮地消嵐
毒人獲樵蘇一舉而三善具焉且課兵分任役不別興歛
蕪有懲人知奉法亦事之便而易舉者也其六曰瓊南徇

處黎夷武備宜飭雖參戎專駐崖州顧監司不涉跡人懷
玩心應如海南道議嵐退歲巡東歷萬至崖西歷儋至郡
皆於較士後操伍而又申以樂安營與郡城發汎之兩閱
軍容旣壯窺侮自銷惟犒費幾何抽調無害則在酌行之
耳其七日全瓊諸水咸自五指山通德霞一江以便互市
但礁石數尺開鑿頗難而欲峻大防正宜閉絕奸商走私
如鷺復借一江通徑實與前交界互市之約矛盾可議耳
其八日用夏變夷實資文教但夷種盤瓠性與人殊且習
書識字固以化頑亦以長慝不若狃狃獠獠鳥獸同羣之
爲得也其九日崇封名山用邀神貺五指山淪在異域議
援會稽鎮事例請號守臣往祭夫事出剏舉道經諸黎神
未居歆黎且燠聽且揚州本是堯封會稽屹爲巨鎮久淪

異域之黎山或未可比崇較烈也其十日治法惟人固無
流品朱梓一椽耳而獨造天柱縣治然間出之才也間才
實難政苦才若梓者不數數得耳制臺槩採用之者壬子
陞本省副使因攝鹽篆先是前道李君報羨餘過當農部
索如額濟邊其責逋五款計二十餘萬公悉綜數十年印
簿據實條剖謂溢餉少許存司庫者正屬黎夷作孽軍旅
繁興猶小腆未易動也至防倭防虜邊陲等急安得微嶺
徼桑土綢繆西北乎所條議數千言上之當事者事得已
乙卯陞江西右參政時淮王怙長蘖又不稱國母觴及諭
教世子公兩啓王直臚其蘖昵羣小收劉帥逃奴獸原墊
射戎場諸魘魅不法并王離邃宮酣外府及世子童心支
屬助逆與護軍根抵語王始引惕正厥臯宮禁賴寧戊午

陞廣西按察使八桂寡讞獄日出視堂皇不崇朝鍵入因以暇註李杜等詩庚申陞本省右轄居無何會謁臺使者小失禮於公輒怏怏曰吾顛毛已落盡無幾而猶折腰諸少年乎遂移病不待報輒歸臺使者覺而大悔亟挽公不得公歸數年朝士有用公者會婦寺表裏正人日錮遂不果又數年而卒年七十二公前後在官率彊直自遂恥脅息於人不近名不矯節一味率真而所至政績亦自爛然居家敦樸無岸異望之者不識爲貴人性孝友嘗痛敬齋公不及竟祿養已侍其母淑人甚謹饗飴湯藥時手爲薦淪所得俸祿頒諸昆季頗不貲而仲兒蚤世事嫂及其孤尤擊生平酷嗜書藏書頗富性尤諧記人有以典故叩者必曰此其集某卷無訛也晚爲詩文一澤於雅所著有寶

綸堂遺稿八卷藏於家公晚年治家頗綜櫛日作法於燕貽臨終語人曰一生碌碌終成幻境遺語後人勿太自作苦長子世穀馴雅向學而蚤天人多惜之

家史氏曰僉憲公嘗從布衣李儲山遊以當下二字爲宗而列以十五物爲數珠曰嗔曰利曰名曰惑曰厭曰著曰齊曰毀曰沈曰決曰昏曰想曰無記以是循環數之總消歸於當下庶幾不以情識爲當下者然非公徹底查考亦不能掀翻至此公根器未必逮人而蚤知有師友一事煨煉之後披露精光卓然大受之器使得竟其用真三韓不足定也然則學亦何負於世乎世人動詆講學爲怪事至以顛門錮君子激成世道之禍千古一轍悲夫方伯公忠質之資果於自信率其素履允孚家邦豈所謂南山之竹

不揉自直者乎

兩世先贈公附狀

宗周論世至兩先贈公而不禁廢楮欲絕也記稱敬身所以成親而歸之君子其親則其遺親以合名不亦永乎宗周生而孤弗克終事王考及厥考過庭之未嫻而時長傲僻蓋終其身於小人之流以爲親僂矣一日有宗乘之役緬懷音容允垂金石而猥以不腆之辭爲千秋累寧不益重之僂無已請姑從縉紳先生表志中摘其大畧附之末簡以俟後之君子折衷而論著焉嗚呼一家之言而猶不敢以毛裏阿所好傷闕文之義庶幾勉茲敬德云爾

先王考兼峰府君諱焯字仲厚行堂三十四考曰茅山公質直簡元喜面折人過弟學博公既老猶視公動定爲出入其里中子弟之衰邪而遊惰者異衣冠者相戒不敢過公門晚秉宗政族之冠娶妻生子必以告儼然行古宗法焉自公而前爲守直公怡軒公素菴公遂安公孝義家風五世如一日以及府君益服其教不衰府君於茅山爲仲子而視其伯季愛有加生而癯不令竟學已舉先君子齟齬特甚府君喜曰吾志有托矣於是歲延名師課之積十餘年至賣盡田廬而先君子學成會先君子溘焉中道府君志大挫不冠不履廢處一小樓者三年先是府君年三十九而喪陳淑人也虛以後母爲先君子累遂終身不娶至是府君年五十餘矣身抱鰥而家洗不復留一椽乃去而隱於麻溪山莊宗周母子不能從則就養外家仲叔出贅朱獨季叔嬸侍養又相繼夭歿府君子然荒山中挾一

僕曰來清以力耕自給佐以樵漁辛苦備嘗每值大雪淫潦連日夜輒掩扉絕爨處之宴如也府君性好客歲所耕塉田數畝必種糯以爲釀具比其穫也釀一宿而成酷輒呼客飲飲輒罄又數釀數罄以爲常居恒善蒔花果籬落間四時之候皆具或報果熟花開府君輒市酒佐以網罟名客卽山鄰家覘府君有酒不待名已盈座中府君顧而樂之無何清死矣乃大慟曰天乎我乃不得以一僕終餘年至仲叔死則不哭曰終奈彼蒼何時府君年已七十餘而宗周漸長一日自外家趨覲府君府君爲一粲未幾宗周以弱冠登鄉書捷至山中喜出望外始迎府君僦居故里又四年竟迨宗周成進士授官行人謁告以萬厯乙巳奉府君終於正寢年八十有一又若干年宗周官三品京

朝會今上冊立東宮恩晉贈府君通議大夫順天府府尹始府君家際僥輒好施粥飢施櫬無虛日中年困乏至身并四窮民而陶然有以自遣嘗曰人生得喪命也長戚戚何爲及晚得宗周乃嘆曰使吾向者以憂患自殞安得有今日雖然此吾教子之報也豈非天乎豈非天乎益往來麻溪召故所與飲者而樂之迄於壽終宗周晚奉膝下有年熟察府君心事熙熙穆穆如嬰兒未孩在醜夷不爭處波靡不亂而一種樂天知命之見得之性成府君其生而近道者耶麻溪山莊者瀕江瘠土茅山府君方析產而府君讓其腴者遂得此寢邱用以鰥老德義風流永著來禩鄉先生胡璞完罔卿表其墓亟稱隱君子云先君子秦臺府君諱坡字汝峻行慶四十七生而蚤慧年

十二能文試童子有寧馨譽已而丁陳淑人憂年十八補會稽邑庠卽騰文價吾宗白眉三五人一時咸以爲不及也隆慶庚午萬厯癸酉丙子連舉鄉試不利明年丁丑捐館年三十太淑人先舉一子而殤一女甫週歲又明年戊寅宗周以遺腹生旣長用太淑人教讀府君遺書二十年遽取科第去人咸怪之以爲府君有靈萬厯甲辰宗周筮仕行人卽用冊立貞皇帝東宮恩移贈府君修職郎行人閱天啓辛酉用哲皇帝登極晉贈府君承德郎禮部儀制司主事如宗周官癸亥用皇子生恩晉贈府君中憲大夫太僕寺少卿如宗周官乙丑以宗周削籍奪誥崇禎改元戊辰今上登極還誥庚午用冊立東宮恩晉贈府君通議大夫順天府府尹如宗周官前後四命皆覃恩異數而宗周服官無狀累坐廢累起又坐削而起輒與恩數會事非偶然者豈府君在天之靈無日不憑於子之身至行或翼之止或攜之日取生平所未食者而償之如取諸券乎不然卽宗周得自比人子亦何敢望此於是世有知宗周者益推本府君謂府君死而不死云宗周生不及見府君長而追事王考間舉府君以示訓稱府君爲人端飭有志操居恒動止以禮雖一巾一櫛措置有常度晝無故未嘗處內室所舉子女育於乳媪每提抱未嘗親授受必自太淑人轉相接也府君年十六喪陳淑人輒哀毀王考感之而罷斷絃之操後遭祖妣茅安人喪未卒哭不應舉或謂期喪無不應舉者府君泣然曰禮以情制耳情之所鍾禮豈能奪聞者韙之府君少而卞急最後讀書羅文懿公家歸

啓王考曰比處羅氏見其家父子兄弟皆肅雍相接遠勝吾門兒當取以爲法王考亟許可自此府君德性日底於和粹而家庭間風尚一變府君性寡交遇異已者心弗以爲是輒怫然改容其人自謝去吾宗惟太虛玉笥崑崙震陽諸公稱莫逆而諸公皆以名德聞宗周每從諸公遊又亟稱府君神清而峻行潔而修學博而邃蔚爲國器嗚呼此府君所爲死而不死也後司成陶文簡公銘府君墓曰德徵於符業廣於餘可謂傳信府君工書法尤精於小楷宗人至今有珍藏之者亦工祿命家言嘗自卜終身休咎多奇驗其於他嗜好澹如也先太淑人別有傳

